

## Jon

### *Od Anĩ Tamo Wõ Yen*

<sup>1</sup> Gariya bun Od anĩ ibodon, Od anĩ Negur ado dibodon, Od anĩ Negur. <sup>2</sup> Gariya bun ĩ Negur ado dibodon.

<sup>3</sup> ĩ bunem ererb ererb ganan inon, Od anĩ sã bun ererb inodin taka to ibodok. <sup>4</sup> Mata ĩ bun ibodon, mata anĩ tamo neid fula fiya. <sup>5</sup> Fula fiya anĩ gugum bun lalan ifenek, anĩ ere, gugum ĩ fula fiya anĩ to kelein.

<sup>6</sup> Tamo taka Negurem sur fe di, isin, ĩ yana Jon. <sup>7</sup> ĩ fula fiya anĩ yaor fe, kurõ fesiyouf nigin isin, are tamo kayau ganan ĩ bunem momoi douf nigin age fen. <sup>8</sup> ĩ anĩ fula fiya sã, ĩ fula fiya anĩ kurõ fesiyouf nigin isin. <sup>9</sup> Fula fiya bagai yogo tamo kayau ganan lalan ifenẽdif, ĩ tenebur isin.

<sup>10</sup> ĩ teneub bun ibodon, are ĩ bunem teneub inon, anĩ ere, tamo kayau tenebur ein, ĩ to kelein. <sup>11</sup> ĩ yogon bagai anidi bun isin, anĩ ere, yogon bagai anidi ĩ to daleyen. <sup>12</sup> Anĩ ere, idi ĩ daleyen, ĩ yana nigin momoi den anidi bun, Negur idi Negur nẽ gere tar wowã douf nigin igirnẽdin. <sup>13</sup> Sina tama nẽ naud bunem to Negur gere tar wowã den, bouwa nẽ oroya bunem sã, tamo nẽ wau irõya buneg sã, anĩ ere, Negur yogo age fe di, wowã den.

<sup>14</sup> Od anĩ tamo wõ ye fen, ada atun ibodon. Ada yogon fula fiya medeĩya tailen, fula fiya medeĩya are Naal Tekelei Yogo Dogol nẽ, ĩ Tama bun tamal wau ifenẽya ado momoi barikã isin.

<sup>15</sup> Jon ĩ nigin kurõ falaisi wogõ yen. ĩ iweig fen, iron, “ĩ enei nigin aya arokenein, ‘Taka ĩ aya dumeun isif, ĩ aya wal fiyaya, ere nigin, ĩ ket ibodon.’” <sup>16</sup> In wau ifenẽya barikã bunem, ada adok el fiya tale fen, anĩ teten el fiya musei talen. <sup>17</sup> Are Moses bunem lo anĩ talen, anĩ ere, wau

ifenēya ado momoi anī, Jesus Kristus bunem isin. <sup>18</sup> Taka nem Negur to bagai ilen, anī ere, Negur Naal Tekelei Yogo Dogol, ī Tama wagen ibod ken, ī nigin yaor fen.

*Jon Naan Igunē*diya Tamo Ī Yogo Nigin, Aya Kristus Sā, Yen

(*Matyu 3:1-12; Mak 1:1-8; Luk 3:1-18*)

<sup>19</sup> Juda tamo Jerusalem temeleid idim, pris tunī, Lewi nē ibor geid sur difedi di, Jon ī aim yeya anī to difiyē di, Jon ī eig ye kurō fesin. <sup>20</sup> Ī wa fiya sā, kurō falaisi, “Aya Kristus sā,” yen.

<sup>21</sup> Idi ī to difiyen, “Age fiyauf are, ò ai? Ò Eliya de?”

Ī iron, “Aya ī sā.”

Idi diron, “Ò Profet amā tari mafef anim de?”

Ī iron, “Sā.”

<sup>22</sup> Age ye di, idi diron, “Ò ai bagai? Ò amā urokanamā len, idi amā sur difaman anidi gein ke ma malauf. Ò ogo nigin ere wof?”

<sup>23</sup> Jon profet Asaia nē od bun solof iron, “Aya anī, ait taka gerere tuan iweig irok, ‘Odug nē naab madur gouf.’ ”\*

<sup>24</sup> Farisia tamo tunī sur difedin anidim <sup>25</sup> to difiyen, “Ò Kristus sāf, Eliya sāf, Profet anī sāf are, ere nigin naan ugunēdif?”

<sup>26</sup> Jon aitedin yale iron, “Aya naan nem naan agunēdif, anī ere, ā atun, taka ā keleī sā anī ifaref. <sup>27</sup> Ī anī aya dumeun dō fiyaf, aya to biya nigin, in ye su nē malū biru fediya kisi feleya sā.”

<sup>28</sup> Enei ganan Betani oun Jordan naan sitakā, Jon naan igunēdin nē an wō yen.

*Jesus, Negur Nē* Sipsip Naal

<sup>29</sup> Naa taka di, Jon, Jesus wagen iyok isi mog, ile fen, iron, “Ulegef, Negur nē Sipsip Naal, ī tamo ganan neid

---

\* 1:23: Asaia 40:3

mosor yaleledif! <sup>30</sup> Enei nigin au fen, oron, ‘Taka ã aya dumeun isif, ã aya wal fiyaya, ere nigin, ã ket ibodon.’ <sup>31</sup> Aya yug ã keleĩ san, anĩ ere, aya asi, naan nem naan agunẽdif nẽ gariya are, Israel tamo kayau bun ã yaor fouf nigin.”

<sup>32</sup> Age ye fen, Jon enei kurõ feis iron, “Aya, Awa Uur saa ilun tamal kuburir gen isi, ã bun ibod mog, ailen. <sup>33</sup> Aya ã to kelein, anĩ ere, taka ã, aya naan nem naan agunẽdiyof nigin sur fiyan im irokanan, ‘Tamo anĩ, Awa Uur isi, ã bun ibod mog, ulouf, im Awa Uur Fateul nem naan igunẽdiyof.’ <sup>34</sup> Aya ailen nigin kurõ afeis, ‘Eĩ Negur Naal,’ auf.”

*Jesus In Dõ Fiya Tar Uyulil Iweignẽdin*

<sup>35</sup> Naa taka di, Jon, in dõ fiya tar uru geid, baban an difaren. <sup>36</sup> Ì, Jesus isi ile di, ile fen, ã iron, “Ulegef, Negur nẽ Sipsip Naal!”

<sup>37</sup> Sain Jon nẽ dõ fiya tar uru enei karĩ de fen, idi Jesus dõ difiyen. <sup>38</sup> Jesus falei yel, idi ã dõ difiyẽ mog, ile fen, to fedin, “Ã ere oroyeik?”

Idi diron, “Rabi (anĩ nẽ gariya, Tise), õ nain ubodõdig?”

<sup>39</sup> Ì iron, “Umag fen, ulogouf.”

Age ye di, idi dile, ã ibodõdig anĩ dile fen, naa anĩ bun, ã geid dibodon. Are aragau fo kilok age fiya.

<sup>40</sup> Endru, Simon Pita ne tura ã, idi uruwom ereb Jon wogõ yen anĩ karĩ de fen, Jesus dõ difiyen anĩ taka.

<sup>41</sup> Ereb uruwa Endru age fen are, ã tura Simon imir ile fen, irokenen, “Amã Mesia (anĩ Kristus) fotou mafen.” <sup>42</sup> Age ye fen, Endru, Pita Jesus wagen irou ile di,

Jesus Pita lo fiye ken, iron, “Õ Simon, Jon naal. Õ yanã Sifas douf” (Sifas falei fiyauf are, Pita).

*Jesus Filip Nataniel Ado Iweignẽdin*

<sup>43</sup> Naa taka di, Jesus Galili ileya nigin kisif fen, Jesus Filip fotou fiye ken, irokenen, “Aya dõ wiya.”

<sup>44</sup> Filip ï, Endru Pita ado geid, Betsaida taun temeleid.

<sup>45</sup> Filip Nataniel fotou fiye ken, ï irokenen, “Amã ï nigin Moses nẽ Lo bun itoton ado profet idig ditoton, Jesus Nasaret tamal, Josef naal anĩ, fotou mafen.”

<sup>46</sup> Nataniel to fen, “Nasaret! Ereb biya taka, anenem wõya nigin kisi feleya de?”

Filip iron, “Usi ule.”

<sup>47</sup> Sain Jesus Nataniel non iyok isi mog, ile fen, ï nigin iron, “Eĩ Israel tamo bagai, ï bun ereb idegẽya taka sã.”

<sup>48</sup> Nataniel Jesus to fiyen, “Naig wo fen, õ aya keleĩ?”

Jesus aiten yale iron, “Aya õ Filip iweignõya sã mog, aa fig farumen ubod mog, ailyon.”

<sup>49</sup> Age ye di, Nataniel Jesus irokenen, “Rabi, õ Negur Naal, õ Israel neid King.”

<sup>50</sup> Jesus iron, “Aya õ aa fig farumen ailyon aul nigin, õ momoi wof. Õ anĩ wal fiya ereb ereb odug ulouf.” <sup>51</sup> ï tobol fe iron, “Aya ã momoi bagai arokeneik, ã, saa bobog kã fele di, Negur nẽ engel Tamo Naal bun diselef disif dife mog, ulogouf.”

## 2

### *Jesus Irõ Di, Naan Wain Falei Felen*

<sup>1</sup> Naa uru bure fele di, naa towo bun, tamo kayau ado bagu fiya, Galili distrik oun Kana fonõ wõ yen. Jesus sinag an ibodon. <sup>2</sup> Jesus in dõ fiya tar geid idig, tamo kayau ado bagu fiya bun diweignẽdin. <sup>3</sup> Sain wain sa kele di, sinam Jesus irokenen, “Idi wain taka sã.”

<sup>4</sup> Jesus iron, “Kayau, õ ere nigin aya kababal wiyaf? Neu sain fau isiya sã.”

<sup>5</sup> Jesus sina, kabĩ tamo irokenẽdin, “Ereb ï irokeneĩf anĩ dõg, ago gouf.”

<sup>6</sup> Nodin meein gulub sigis naan ifotūya nē difaren, are Juda neid tobonuneid bun imeid kulo fiya nigin, idi teke tekelei 100 lita age fiya naan iroudig.

<sup>7</sup> Jesus kabī tamo irokenēdin, “Gulub bun naan utinēdig.” Age ye di, idi ditineīd eweid gere fesedin.

<sup>8</sup> Age difele di, Jesus idi irokenēdin, “Gama tunī lolob ge fen, sifa marau uroule kenēg.”

Age ye di, idi age difen. <sup>9</sup> Sifa marau naan wain falei fen anī yō ilen. Ī wain anī nainenem be isin anī to kelein, anī ere, kabī tamo naan lolob difen idi kelein. Agef fen, sifa marau ĩ, kayau marau yerin iweignē, ile di, <sup>10</sup> irokenen, “Ganan idi wain biya anī ket dirousi di, tamo disif idi anī fatuk dō mog, to biya gen anī dum dirousidig, anī ere, ō biya bagai urou ubodom anī, gama bagai urousif.”

<sup>11</sup> Jesus memelik gariya inon are enei bun, oun Galili distrik Kana fonō. Anī bun, ĩ yogon fula fiya medeiya yaor fe di, yogon dō fiya tar dogo neid momoiya ĩ bun dinon.

### *Jesus Tempel Waī Fen*

*(Matyu 21:12, 13; Mak 11:15-17; Luk 19:45, 46)*

<sup>12</sup> Enei bure fele di, Jesus ĩ, sina, tura tar ado, yogon dō diya tar geid, Kapenaum disilen. An naa musei to dibodon.

<sup>13</sup> Juda neid Pasa naa sain melsā mog, Jesus Jerusalem iselen. <sup>14</sup> Tempel modoū bun, tamo, bulmakau, sipsip ado, kuburir na sur difeid fen, tunīg tebol bun dibod ken, moni solo de mog, iledin. <sup>15</sup> Anī ile fen, ĩ malū nem wip inon, agef fen, tempel modoū bun tamal, sipsip ado bulmakau ganan irudi di, serē dilelen, ĩ moni solo fiya tamo neid koin moni daūf firagagaū fe fen, ĩ dogo neid tebol yale, falei feledin. <sup>16</sup> Idi kuburir na sur difen anī irokenēdin, “Eneidi ein waleledig, neu Dei nē fō anī maket modoū to unog!”

<sup>17</sup> Dum in dō fiya tar, eig ye itotoya anī nigin wedereid fokō yen, “Ogon fō nigin wau itenēya anim nameun isainaf.”\*

<sup>18</sup> Age ye di, Juda tamo Jesus dirokenen, “Ere memelik anī ufelnamā di, enei ganan agof anī nigin ò igiriya ado mauf?”

<sup>19</sup> Jesus idi irokenēdin, “Tempel enei narī weleg len, naa towo bun baban alesauf.”

<sup>20</sup> Juda tamo diron, “Tempel enei dinon are, foti-sigis yar yalen, anī ò naa towo bun walesauf de?” <sup>21</sup> Anī ere, tempel ī wogō yen are, yogo bouwa nigin. <sup>22</sup> Ī laa bunem kel fā yen anī bure fele di, in dō fiya tar, ī iron anī, wedereid fokō yen. Anī bunem, idi Negur nē Itotoya ado Jesus wogō yen anī nigin momoi den.

<sup>23</sup> Gama Ī Jerusalem oun sain Pasa Sifa bun ibod ken, tamo kayau musei memelik inodin anī dilen, anī bun ī yana nigin momoi den. <sup>24</sup> Anī ere, Jesus ī yogo bagai, idi nigin to momoi yen, ere nigin, ī tamo ganan nigin keleī. <sup>25</sup> Jesus Ī, tamo takam taka nigin Ī irokenēya anī kisi feleya san, ere nigin, ereb tamo name bun ibodok, ī yogo keleī.

### 3

#### *Jesus Nikodemus Ifelnen*

<sup>1</sup> Farisia tamo taka, yana Nikodemus ibodon, Ī Juda uyu irouya neid kaunsel taka. <sup>2</sup> Ī bō Jesus wagen isi fen, iron, “Rabi, amā keleī, ò tise Negur bunem usin. Ere nigin, taka nem Negur Ī ado to ibodōf are, memelik ò unodif anī inodiya kisi feleya sā.”

<sup>3</sup> Jesus aiten yale iron, “Aya ò momoi bagai arokonok, taka nem Negur nē tano to ilouf, Ī baban mata gō fiyēf dogol.”

---

\* 2:17: Sam 69:9

<sup>4</sup> Nikodemus Jesus to fiyen, “Tamo ï biyan anĩ, sina naig fe baban gõ foug? Momoi bagai, ï sina namen baban ile di, gõ fiyēya kisi feleya sã!”

<sup>5</sup> Jesus solof iron, “Aya õ momoi bagai arokonok, taka ï, naan ado Awa Uurem mata to wõ youf are, ï Negur nē tano bun ileya kisi feleya sã. <sup>6</sup> Bouwam gõ fef are, bouwa nē, anĩ ere, Awa Uurem gõ fef are, uur nē. <sup>7</sup> Õ neu od eig au wogõ auf bun, kisi to gurũ wouf, ‘Ã de baban mata wõ gouf.’ <sup>8</sup> Yau in oroya bun isi iledig. Õ ait dogol karĩ wodig, anĩ ere, õ nainenem isif be, nain be ilef, to keleĩ youf. Ganan idi Awa Uurem gogũ fedif are, age fiya bagai.”

<sup>9</sup> Nikodemus Jesus to fiyen, “Are naig fe, agef wõ youf?”

<sup>10</sup> Jesus iron, “Õ Israel neid tise, anĩ ere, õ enei to keleik de? <sup>11</sup> Aya õ momoi bagai arokonok, ereb amã keleĩ anĩ wogõ mauf, age ma fen, ereb amã mailen anĩ kurõ mafesif, anĩ ere, tamo kayau ã fau amã nemã od to walegef. <sup>12</sup> Aya ã ereb tenebur tamal nē anĩ wogõ ayeik, anĩ ere, ã to momoi gef, saa ilun tamal nē anĩ wogõ ayeifeg, naig ge momoi gouf? <sup>13</sup> Aibem taka saa ilun to iselen, Tamo Naal saa ilunem isin yogo dogol. <sup>14</sup> Moses gerere tuan gogour yalesen, age fiya bagai, Tamo Naaleg age de dalesnēf. <sup>15</sup> Are ganan idi ï nigin momoi def, mata faimud ibodkeleya adouf nigin.

<sup>16</sup> “Negur, tamo kayau teneub enei bun ganan nigin fatuk wau laa fen nigin, yogon Naal tekelei bagai anĩ ifenēdin, are taka ï, ï nigin momoi youf are, to fõ yalauf, mata faimud ibodkeleya adouf nigin age fen. <sup>17</sup> Negur ï, yogon Naal teneub enei bun, tamo kayau es fediya nigin to sur fen, ï bunem tamo kayau teneub enei bun, kel gei foug nigin sur fen. <sup>18</sup> Taka, ï nigin momoi yef are, to es fiyek, anĩ ere, taka, ï nigin momoiya sã are, ï mogo es fiya bun ifaref, ere nigin, ï Negur Naal tekelei bagai yana nigin to momoi yen. <sup>19</sup> Foi fiya eig fiya, fula fiya teneub enei bun mogo

isin, anī ere, tamo idi dogo neid tobonuneid sane nigin, fula fiya ditor ken, gugum nigin waud laa fen. <sup>20</sup> Tamo idi sane age difef are, lalan to orodidig, ere nigin, dogo neid tobonuneid sane anī yaoreya kumī de fen, lalan namen to disiyouf. <sup>21</sup> Anī ere, aib taka ī momoi bun age fef, lalan namen isidig, age fe di, ereb ī age fen are, Negur bunem age fen anī, yaor dilouf.”

*Jon Naan Igunēdiya Tamo, Jesus Nigin Kurō Fesin*

<sup>22</sup> Anī bure fele di, Jesus in dō fiya tar geid, Judia teneub bun dilen, an ī idi geid sain naal dibod ken, naan igunēdin. <sup>23</sup> Joneg Ainon Salim non naan igunēdin, ere nigin, an naan musei bagai, anī nigin, tamo kayau naan igunēdiyouf nigin toku disidig. <sup>24</sup> (Are Jon fau kalabus bun to dinenē mog.) <sup>25</sup> Jon nē dō fiya tar tunī, Juda tamo taka geid, dogo neid tobonuneid dō de fen, imeid kulo difedig anī nigin luwa diroun. <sup>26</sup> Idi Jon wagen disi dirokenen, “Rabi, tamo ō uruwom Jordan naan sitakā ufareg fen, ī nigin kurō weis uron, ī naan igunēdif, age fe di, ganan ī bun dilef.”

<sup>27</sup> Jon solof iron, “Tamo ī, ereb saa ilun tamal ifenek anī dogol yalouf. <sup>28</sup> Ā aug aya oron anī sã kurō walaisi gef, ‘Aya Kristus sã, anī ere, aya ī ket sur fiyan.’ <sup>29</sup> Mois kayau are, mois tamo nē. Mois nē mou ī, bagu fiya bun ifar fen, karī fiyek, ī mois tamo nē ait anī karī ye fen, kulīya odug ado. Kulīya are neu, anī gama kisi felef. <sup>30</sup> Ī yana odug ise le di, aya yanau tenebur isilauf.

<sup>31</sup> “Taka ī ilunem isif, ī ganan wal fiya, taka ī tenebur tamal are, tenebur nē, anī nigin, tenebur nē anī wogō yedig. Taka ī saa ilunem isif, ī ganan wal fiya. <sup>32</sup> Ereb ī ilen ado karī yen anī, kurō falaisif, anī ere, yogon od taka nem to yalef. <sup>33</sup> Taka ī yogon od yalen anim, Negur ī momoi bagai ye fen, anī megeir ifenen. <sup>34</sup> Taka ī Negurem sur



fiyen are, ï Negur nē od wogō yef, ere nigin, Negur ï Awa Uur idikeleya sã ifenek. <sup>35</sup> Tama ï Naal nigin wau laaf fen, ereb ereb ganan ï ima bun inon. <sup>36</sup> Aib ï Naal nigin momoi yef are, mata gai ibodkeleya ado, taka ï Naal nigin itorok are, ï mata to ilouf, Negur nē didi ï bun ibodok.”

## 4

### *Jesus Samaria Kayau Ado Wogō Den*

<sup>1</sup> Jesus Jon wal fiye ken, in dō fiya tar musei geif naan igunēdif ya anī, Farisia tamo karī den. <sup>2</sup> Anī ere, momoi bagai Jesusem naan igunēdiya sã, are in dō fiya tar anidim. <sup>3</sup> Sain Odug enei kelei ken, ï Judia distrik itor ken, baban Galili kel ilen.

<sup>4</sup> Gama ï Samaria atu ilauf. <sup>5</sup> Anī nigin, ï Sikar taun oun Samaria, Jakop, ne naal Josef teneub kulu ifenen non, iyok isin. <sup>6</sup> An Jakop nē naan ifotokon tutuwō ibodon, Jesus naab meluk iyok isi, tuwa yu kele di, naan ifotokon tutuwō sirin ibodon. Are mogo gaa atun age fiya.

<sup>7</sup> Agef mog, Samaria kayau taka naan ifotūya nigin isi di, Jesus kayau irokenen, “Aya naan tau wana di, āf.” <sup>8</sup> (In dō fiya tar, taun saaf na yaleya nigin dilelen.)

<sup>9</sup> Samaria kayau Jesus irokenen, “Õ Juda tamo di, aya Samaria kayau. Naig fe di, ayam õ naan afon, wãf nigin to wiyaf?” (Juda tamo kayau idi, Samaria tamo kayau geid to uyu katō difedig.)

<sup>10</sup> Jesus kayau irokenen, “Õ safina ege luwa Negur ifonok ado, aibem naan nigin to yok anī keleim are, õ ï to wiyē di, mata ifenēya nē naan anī ifonom.”

<sup>11</sup> Kayau iron, “Odug, õ ifotūya nē safina sã, naan ï ilon bagai. Õ mata ifenēya nē naan are nain walouf? <sup>12</sup> Tamamã Jakop naan ifotok kanama ken, ï yogog gere tar ado gaareg anī bun don, õ ï wal fiya de?”

<sup>13</sup> Jesus kayau aiten yale iron, “Ganan naan enei doko, idi baban naan ail fediyouf. <sup>14</sup> Anĩ ere, taka ĩ aya naan anĩ afenē di, yoko, ĩ baban to bagai naan ail fouf. Naan aya ĩ afenek, warur naan ĩ namen faimud ulo ulō yef yenē di, anim mata gai ibodkalauf.”

<sup>15</sup> Kayau Jesus irokenen, “Odug, naan enei wanauf, ago di, aya baban naan ail to fiya fen, naan enei bun ifotüya nigin toku ein to kelauf.”

<sup>16</sup> ĩ kayau irokenen, “Ule, ogon tamo uroken ken, kel usig.”

<sup>17</sup> Kayau iron, “Aya tamo sã.”

Jesus kayau irokenen, “Õ tamo sã wof are, õ tutuk urok. <sup>18</sup> Ere nigin, õ mogo tamo faif adon, tamo gama õ ado are, ogon aiwã sã. Õ ogo urom, are momoi bagai.”

<sup>19</sup> Kayau iron, “Odug, aya õ ailiyok, õ profet taka. <sup>20</sup> Amã tamamã tar, arei enei bun Negur yana dalesedig, anĩ ere, Juda ã urōgedig, Negur yana yaleseya modoũ are oun Jerusalem dogol.”

<sup>21</sup> Jesus kayau irokenen, “Kayau, aya momoi wiya, sain fau isi di, baban arei enei bun ado, Jerusalemeg an, Dei yana to walesagauf. <sup>22</sup> Samaria ã, ereb ã keleĩ sã anĩ yana walesegedig, amã ereb amã keleĩ anĩ yana malesedig, ere nigin, tamo kayau kel yaleya nē are, Juda ibor bun tamal.

<sup>23</sup> Sain isiyouf are, gama mogo yeir isil, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fediya anĩ Dei ĩ imirnēdif.

<sup>24</sup> Negur ĩ uur, anĩ nigin, ĩ yana dalesedig idi, uur ado momoi bunem, yana dalesauf.”

<sup>25</sup> Kayau iron, “Aya keleĩ, Mesia (Kristus dedig) fau isif. ĩ isiyouf sain bun, ereb ereb ganan faded famãf.”

<sup>26</sup> Age ye di, Jesus kayau irokenen, “Aya inim yeir od ayok.”

*Jesus Nē Dō Fiya Tar Keku De Disi, Jesus Geiden*

<sup>27</sup> Agef mog bagai, in dō fiya tar keku de disī, Jesus kayau anī ado od de mog, dileid fen, terē den. Anī ere, taka nem to, to fiyen, “Ō ere oroyok?” be “Ō ere nigin ī ado od gef?”

<sup>28</sup> Kayau, ne naan gulub itor yen, taun kel ile, tamo kayau irokenēdin, <sup>29</sup> “Umag, tamo taka, aya ereb ereb ganan age afef asin irokanal anī uleg. Ī anī Kristus be.”

<sup>30</sup> Idi taun ditor disī, Jesus garan dilen.

<sup>31</sup> Age de mog, in dō fiya tar Jesus totol bagai dirokenen, “Rabi, ereb taka wō.”

<sup>32</sup> Anī ere, ī idi irokenēdin, “Aya saaf ā keleī sā anī āf nigin ado.”

<sup>33</sup> Age ye di, in dō fiya tar abob dirokenen, “Taka nem mogo saaf irusi ifenem de?”

<sup>34</sup> Jesus iron, “Neu saaf are, aya sur fiyan in oroya dō afe fen, in kabī bure afalauf anī. <sup>35</sup> Ā eig ge to urōgedig de, ‘Ogō fo bure fele di, kusu fiya sain wō youf’? Aya ā arokeneik, meleī fara weleg fen, kabī onoudī ulogouf! Idi mogo kusu fiya nē mayo bure felen. <sup>36</sup> Kusu fiya tamo ī gama mala solo yalef, ī gama mata faimud ibodkeleya nē biya kususū fef, anī bun, itenēya tamo ado kusu fiya tamo waud al fouf. <sup>37</sup> Anī nigin, od enei momoi bagai, ‘Tamo takam itenēdig, tamo takam kusu fedig.’ <sup>38</sup> Aya, ā kabī to walegen nē an, kusu fiya nigin sur ayein. Tunim kabī totol dalen, anī ā idi neid maab mala anī kusu gen.”

*Samaria Tamo Kayau Musei Momoi Den*

<sup>39</sup> Samaria tamo kayau, taun anī bun temeleid musei, ī nigin momoi den, ere nigin, kayau anī eig ye kurō fesin, “Ī ereb ereb ganan age afef asin anī irokanal.” <sup>40</sup> Anī nigin, Samaria tamo kayau ī gein disī, ī idi geid dibodōf nigin totol bagai dirokenē di, ī naa uru, idi geid dibodon. <sup>41</sup> In od bunem, musei fau fau momoi den.

<sup>42</sup> Idi kayau anĩ dirokenen, “Amã ogon od bun dogol to momoi mauf, ere nigin, amã mug karĩ mau fen, amã keleĩ, tamo enei momoi bagai teneub ganan enei nē Isennēya.”

*Jesus, King Nē* Kabĩ Mudur Naal El Fiyen

<sup>43</sup> Naa uru bure fele di, Jesus Galili ilen. <sup>44</sup> Jesus ĩ yogo iron, ‘Profet taka, yogon fõ gariyan, ĩ yana sã.’ <sup>45</sup> Sain ĩ Galili wõ yen, Galili tamo kayau ĩ daleyen. Idi Jerusalem Pasa Sifa bun, ĩ erob erob age fen ganan dilen, ere nigin, idig an weim difaren.

<sup>46</sup> ĩ baban Galili distrik oun Kana fonõ ki fen, kulu an ĩ naan wain falei felen. Sain anĩ bun, king nē kabĩ mudur taka nē naal Kapenaum taun an dagi yenen. <sup>47</sup> Tamo enei, Jesus Judia distrik tamal Galili isin anĩ karĩ ye fen, ĩ Jesus gein ile, ne naal laa melsã yenen anĩ, isi el fiyēf nigin igonen.

<sup>48</sup> Jesus ĩ irokenen, “Ā memelik uris ado anĩ to ulogouf are, ā to bagai momoi gouf.”

<sup>49</sup> King nē kabĩ mudur iron, “Odug, neu kesu fau laa fiya sã mog, õ usiyouf.”

<sup>50</sup> Jesus ĩ irokenen, “Õ wadã ule. Õ naal fau mata ibodõf.”

Tamo anĩ, Jesus nē od momoi ye fen, ilen. <sup>51</sup> ĩ fau naab iyok ile mog, yogon ferfer ĩ fotou difiye ken, yogon kesu mata ibodok anĩ wogõ difiyen. <sup>52</sup> Age de di, ĩ gaa mala ganĩ bun, ne naal dagi karikan anĩ to fiyēdin. Idi ĩ dirokenen, “Bouwa uruwa, nor wan kilok aragau folõ fiye kelen.”

<sup>53</sup> Age de di, tama ĩ kelein, sain anĩ bun bagai, Jesus irokenen, “Õ naal fau mata ibodõf.” Anĩ nigin, ĩ yogo, ne fõ tura tar ganan geid, momoi den.

<sup>54</sup> Jesus Judia distrik bun tamalem Galili isi fen, memelik inon, are eneim anĩ uru.

## 5

*Jesus Dagı Tamo Betesta Naan Kolili Fıyan El Fıyen*

<sup>1</sup> Dum, Jesus Juda neid sifa bun Jerusalem iselen.  
<sup>2</sup> Jerusalem an Sipsip Bobog non, naan kolili fiya taka Hibru od nem Betesta dedig ibodok, naan kolili fiya anī sirin meein torem fō faif dinodin dibodok. <sup>3</sup> An dagi tamo kayau musei denenādig, meleid ifofakeleya, yeid kirorōya, bouweid ilolaisidin.\* <sup>5</sup> Difaren nē an, tamo taka dagi ado ibodok ile, teti-eit yar yalen. <sup>6</sup> Sain Jesus ĩ an yen mog, ile fen, ĩ sain meluk dagi ado an yenen anī kelei ken, ĩ to fiyen, “Ō biya leya oroyok de?”

<sup>7</sup> Dagi tamo iron, “Odug, sain naan moyō fe di, taka nem isenna di, naanū isileya to ibodok. Aya asilauf au mog, taka ketem yu wal fiya fen, isiledig.”

<sup>8</sup> Age ye di, Jesus ĩ irokenen, “Fã wo! Ogon gogoũ wenēdig anī wale fen, uyok ule.” <sup>9</sup> Age ye di, tamo kaisã bagai dagi sa kelei di, ĩ yogon gogoũ yale fen, iyok ilen.

Anī wō yen naa are, Sabat naa. <sup>10</sup> Anī nigin, Juda tamo idi, tamo dagi sa kelen anī dirokenen, “Naa eĩ Sabat naa.† Ō ogon gogoũ irouya nigin lo katũ yef.”

<sup>11</sup> Anī ere, ĩ aitedin yale iron, “Tamo ĩ el fiyal anim, ‘Ogon gogoũ wenēdig anī wale fen, uyok ule,’ fiyal.”

<sup>12</sup> Anī nigin, idi ĩ to difiyen, “Tamo enei nanim, ‘Ogon gogoũ wale fen, uyok ule,’ yom?”

<sup>13</sup> Tamo el fiyen, ĩ aib ya anī nene yelen, ere nigin, Jesus ĩ an guru difen anī namen iwaikelen.

<sup>14</sup> Dum Jesus tamo anī tempel bun fotou fiye ken, irokenen, “Ulef, õ baban biya lel. Baban mosor to uno, are ereb sane bagai uruwa nē wal fiya anī, õ bun to wō youf

---

\* **5:3:** Itotoya tunī eig de ditoton: ilolaisidin. Idi naan moyō foug nigin tari difedig. **4** Sain taka taka Odug nē engel taka isi, naan moyō fedig. Taka ĩ moyō mugu mugu ile fen, ĩ ket naanū isilef, ĩ ereb dagi ado are el feledig. † **5:10:** Sabat naa anī, Juda neid uub nē naa.

nigin.” <sup>15</sup> Tamo are ile, Juda tamo irokenēdin, ‘Aya el fiyal tamo are Jesus,’ yen.

*Negur Naal Bunem Mata Ibodōya*

<sup>16</sup> Jesus Sabat naa bun enei age fedig nigin, Juda tamo idi ī morō difenen. <sup>17</sup> Jesus idi irokenēdin, “Neu Dei ī faimud kabī yalef isi, gama naa enei buneg kabī yalef, anī nigin, ayag kabī alef.” <sup>18</sup> Jesus age yen nigin, Juda tamo idi ī dukesiyouf nigin kabī total dalen, Sabat naa nē lo wal fiya bun nigin dogol sā, ī Negur nigineg neu Dei ye fen, aya Negur ado tekelei yen nigin.

<sup>19</sup> Anī nigin, Jesus od enei idi irokenēdin, “Aya ā momoi bagai arokeneik, Naal ī yogon oroyam ereb taka to age fouf, ī Tama age fef anī dogol ile fen, īg age fedig, ere nigin, ereb Tama age fef are Naaleg age fouf. <sup>20</sup> Tama ī Naal nigin wau laaf fen, ī ereb ereb age fedig anī ganan ifelnek. Ī ereb ereb enei wal fiya Naal ifelnēf, anī bun ā terē gouf. <sup>21</sup> Tama ī laa turī feid fen, mata ifenēdidig, age fiya bagai, Naal īg aib ī orof anī mata ifenēdig. <sup>22</sup> Tama ī aib taka to es fiyēf, anī ere, ī es fiya kabī ganan Naal bun inon, <sup>23</sup> are tamo kayau ganan idi Temeid yana dalesedig gen, Naal nigineg yana dalesauf nigin ī age fen. Taka ī Naal yana to yalesef, ī Tamam Naal sur fiyen anī yana to yalesef.

<sup>24</sup> “Aya ā momoi bagai arokeneik, taka ī neu od karī ye fen, aya sur fiyan ī nigin momoi yef, ī mata faimud ibodkeleya ado fen, es fiya bun to ilauf. Ī laa bun tamal ibal fen, mata bun ilen. <sup>25</sup> Aya ā momoi bagai arokeneik, sain fau isif, are mogo yeir isil, laa tamo Negur Naal nē ait karī douf, idi karī def anidi mata dibodōf. <sup>26</sup> Tama ī yogo bun mata ado, age fiya bagai, ī mata de anī Naaleg adouf nigin ifenen. <sup>27</sup> Agef fen, Tama ī Naal es fediyouf nigin megeir ifenen, ere nigin, ī Tamo Naal.

<sup>28</sup> “Eig fiya bun to terē gouf, sain fau isif, ganan nedi matmat bun dibodok idi, yogon ait karī de fen, <sup>29</sup> ulolō desiyouf, idi biya age difen anidi mata dibodōf nigin fafā douf, idi sane age difen anidi es fedī di, hel bun dilauf nigin fafā douf. <sup>30</sup> Aya neu oroyam, ereb taka to naig be afouf. Aya karī auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anī ere, aya sur fiyan ī wau al fouf nigin au fen, age afedig.

*Jesus Yogo Nigin Kurō Fesin*

<sup>31</sup> “Aya yug nigin aya mugu wogō auf are, neu wogōya are, momoi be sã be anī yaur sã. <sup>32</sup> Taka ī aya nigin kurō fesidig, agef fen, aya keleī, ī aya nigin kurō fesif are momoi.

<sup>33</sup> “Ā Jon garan tamo tunī sur wedige di, ī aya nigin momoi od anī kurō falaisi irokenēdin. <sup>34</sup> Aya tamom aya nigin kurō fesif anī to aroudig, anī ere, aya ā isenneīf au fen, od anī wogō aun. <sup>35</sup> Jon ī lam futur fen, lalan ifenen, age fe di, ā sain tobega bagai waleg fen, in lalan nigin wauī al fen.

<sup>36</sup> “Neu kurō fesiya anī Jon nē wal fiya, ere nigin, kabī aya bure afalauf nigin Dei ifanan alef anim, Dei ī aya sur fiyan anī kurō fesif. <sup>37</sup> Dei ī sur fiyan ī yogo, aya nigin kurō fesin. Ā ī ait to karī gen, nog to ulegen, <sup>38</sup> in odeg ā bun to ibodok, ere nigin, ā sur fiyen anī ī nigin to momoi gedig. <sup>39</sup> Ā Negur nē Itotoya keleī youf nigin kabī total walegedig, ere nigin, ā kisi gef, anī bunem amā mata faimud ibodkeleya malef ge fen, ago gedig. Negur nē Itotoya enei, aya nigin kurō fesif. <sup>40</sup> Anī ere, ā mata yaleya nigin, aya wageun isiya utorōgedig.

<sup>41</sup> “Aya tamom yanau dalesauf nigin to orok, <sup>42</sup> anī ere, aya ā nigin keleī. Aya keleī, ā wauī bun Negur nigin wauī laa fiya to ibodok. <sup>43</sup> Aya neu Dei yana bunem asin, anī ā aya to waleyagen, anī ere, aibem taka yogo yana bunem

isif are, ã walogouf. <sup>44</sup> ã abob yana yaleseya anĩ oroyei ken, yana yaleseya Negur Tekelei bunem isif anĩ to total unog walogouf are, ã naig ge momoi gouf?

<sup>45</sup> “Anĩ ere, ã ayam Dei mala bun ãgenei sane anĩ kurõ afesiyouf ge fen to kisig. ãgenei sane kurõ fesiya are Moses, ĩ bun ãgenei wauĩ iseya unogedig anĩ. <sup>46</sup> ã Moses nigin momoi gem are, aya nigineg momoi gem, ere nigin, im aya nigin itoton. <sup>47</sup> Anĩ ere, ereb ĩ itoton anĩ to momoi gef nigin, naig ge fen, aya wogõ auf enei nigineg momoi gouf?”

## 6

### *Jesus Faif Tausen Tamo Saaf Ifenēdin* (Matyu 14:13-21; Mak 6:30-44; Luk 9:10-17)

<sup>1</sup> Enei dumen, Jesus Galili Maaĩ ub sitakã ibal ilen (Galili Maaĩ anĩ, yana taka Taiberias Maaĩ). <sup>2</sup> Age fe di, tamo kayau musei ĩ dõ difiyen, ere nigin, ĩ dagi tamo kayau bun memelik ino di, meledim dilen. <sup>3</sup> Agef fen, Jesus arein isel, yogon dõ fiya tar geid dibodon. <sup>4</sup> Juda neid sifa inoya Pasa naa melsã mog.

<sup>5</sup> Sain Jesus mala irakel, tamo kayau musei ĩ garan disi mog, ileid fen, ĩ Filip irokenen, “Ada tamo kayau eneidi dãf nigin, bret nain na talouf?” <sup>6</sup> ĩ Filip kisi fiye ken, enei to fen, ere nigin, Jesus ĩ ereb age fouf nigin are ĩ keleĩ.

<sup>7</sup> Filip Jesus aiten yalen, “Ogõ eit nē mala anim, idi mugu mugu nigin bret na talouf are, tunĩ to dõ dilouf.”

<sup>8</sup> In dõ fiya tamo taka Endru, Simon Pita nē tura anĩ Jesus irokenen, <sup>9</sup> “Kesu taka yeir baali bret faif gau uru ado, anim musei ganen enei tau kisi falauf?”

<sup>10</sup> Jesus iron, “Tamo kayau urokenēdig len, dibod.” Modoũ anĩ bun fisir musei ado, an tamo dibodadan faif tausen age fiya. <sup>11</sup> Gama Jesus bret anĩ geif, Negur de fiye



ken, idi dibodadan neid oroya kilei, anĩ gadõ fedin. Ĩ gau buneg de age fen.

<sup>12</sup> Idi ganan dõ kisi fele di, Jesus in dõ fiya tar iro-kenẽdin, “Tunĩ ditoraram anĩ kurug. To sekil fiyauf.”

<sup>13</sup> Anĩ nigin, baali bret faif anĩ idi dokon, masak tunĩ ifaredin anĩ kuru dife di, karam tuwelf isokosedin.

<sup>14</sup> Tamo kayau memelik inon anĩ dile fen, idi diron, “Momoi bagai, enei are Profet teneub enei bun isiyouf ya anĩ.” <sup>15</sup> Idi disi, Jesus king ibodõf nigin nugo difiyẽf ya anĩ, ĩ kelei ken, baban mugu arein kel iselen.

### *Jesus Naan Teteatu Lyon*

*(Matyu 14:22-33; Mak 6:45-52)*

<sup>16</sup> Gugumek isi di, yogon dõ fiya tar daliyoun disilen.

<sup>17</sup> An idi waag taka bun sosõ de daliyou dibal fen, Kapenaum luwe dile mog, mogo gugumen, anĩ Jesus fau idi garan to isin. <sup>18</sup> Yau total isi di, maaĩ moloun wĩ yen. <sup>19</sup> Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumĩ tererẽ den. <sup>20</sup> Anĩ ere, ĩ idi irokenẽdin, “Are ayam, to kumĩ wog.” <sup>21</sup> Age ye di, ĩ waag bun dalesnẽf nigin waud yenen, kaisã bagai, idi dilauf nẽ waud iron ub anĩ bun, waag goro fen.

<sup>22</sup> Naa taka di, tamo kayau daliyou ub sitakã difaren idi kelein, waag tekelei dogol an ibodon, anĩ Jesus in dõ fiya tar geid to sõ den, idi dogo dogol dilen. <sup>23</sup> Waag tunĩ Taiberias temeleid, Odug, bret Negur de fiye ken, tamo kayau ifeneid don modoũ anĩ non, goro difen. <sup>24</sup> Tamo kayau, Jesus in dõ fiya tar geid an to dibodon anĩ kelei ken, idi waag sosõ de fen, Jesus dimirnẽf nigin Kapenaum dilen.

### *Jesus Mata Nẽ Bret*

<sup>25</sup> Sain tamo kayau idi, daliyou sitakã Jesus fotou dife fen, idi ï to difiyen, “Rabi, ere sain ò ein usin?”

<sup>26</sup> Jesus aitedin yalen, “Aya ã momoi bagai arokeneik, ã aya umirnagef, ã memelik ulegen nigin sã, anï ere, ã bret ifoutneï di, wōg eweï gere fen nigin. <sup>27</sup> Saaf sane ledig anï nigin to kabï waleg, anï ere, saaf to sane le fen, mata faimud ibodkeleya bun ibodōdig anï nigin kabï waleg, are Tamo Naalem ifeneïf. Ï dogol Tama Negurem igrine ken, yoya nē megeir ganan ifenen.”

<sup>28</sup> Age ye di, idi ï to difiyen, “Amã Negur nē kabï malouf nigin, naig bagai mafouf?”

<sup>29</sup> Jesus solof iron, “Negur nē kabï are yeir, Negurem sur fiyen ï nigin momoi gouf.”

<sup>30</sup> Anï nigin, idi ï to difiyen, “Ere memelik bun uris wanamã di, mail fen, ò momoi mayōf? Ere anï ò unouf?”

<sup>31</sup> Amã nemã tubumã tar gerere tuan mana don, Negur nē Itotoya bun eig ye yenek kilei, ‘Ï idi saa ilun tamal bret dãf nigin ifenēdin.’\* ”

<sup>32</sup> Jesus idi irokenēdin, “Aya ã momoi bagai arokeneik, Moses im bret saa ilun tamal to ifenein, anï ere, neu Dei ï yogo bret kaũ bagai saa ilun tamal ifeneik. <sup>33</sup> Ere nigin, Negur nē bret saa ilun tamal isi fen, teneub enei mata ifenek.”

<sup>34</sup> Idi diron, “Odug, gama ilauf enei bun bret anï wanamã.”

<sup>35</sup> Jesus idi irokenēdin, “Aya anï mata nē bret. Taka ï aya bun isif, to bagai naũ ilauf, taka ï aya nigin momoi yef, to bagai naan ail fouf. <sup>36</sup> Anï ere, aya ã arokenein kilei, ã mogo uleyagen, anï fau to momoi gef. <sup>37</sup> Idi ganan Deim ifanaf, aya bun disiyouf, taka ï aya bun isif, aya to bagai aruwauf. <sup>38</sup> Aya saa ilun tamal asin, aya neu oroya dō afouf nigin sã, anï ere, aya sur fiyan nē oroya dō afouf nigin.

\* **6:31:** Eksodas 16:4; Nehemaia 9:15; Sam 78:24, 25

<sup>39</sup> Aya sur fiyan nē oroya are yeir, idi ganan ī ifanan taka to folō afalauf, anī ere, aya idikeleya naa bun alesnēdiyof.

<sup>40</sup> Neu Dei nē oroya anī, taka ī Naal ile fen, ī nigin momoi yef, mata faimud ibodkeleya yalouf, idikeleya naa bun aya alesnēf.”

<sup>41</sup> Od enei Juda tamo karī de fen, ī nigin nauseir den, ere nigin, Jesus iron, “Aya bret saa ilun tamal asin.” <sup>42</sup> Idi diron, “Eī Jesus sã de? Josef naal, in sina tama ado ada keleī. Naig fe di, ī irok, ‘Aya saa ilun tamal asin?’”

<sup>43</sup> Jesus solof iron, “Ã aug to nauseir gouf. <sup>44</sup> Taka yogon oroyam, aya wageun isiya kisi feleya sã, anī ere, Dei aya sur fiyan inim, ī namen kabī yale fen, aya garan irou isiyof. Age fe di, idikeleya naa bun, aya ī alesnēf.

<sup>45</sup> Profet neid itotoya bun eig ye yenek, ‘Idi ganan Negurem ifelnēdiyof.’† Taka ī Dei karī fiye ken, ī bun keleī yalef, aya bun isidig. <sup>46</sup> Taka nem Dei to ilen, Negur bunem isin im dogol. Ī yogo dogol Dei ilen. <sup>47</sup> Aya ã momoi bagai arokeneik, taka ī momoi yef, mata faimud ibodkeleya ado.

<sup>48</sup> Aya mata nē bret. <sup>49</sup> Āgenei tubuī tar gerere tuan mana don, anī ere, idi gare den. <sup>50</sup> Anī ere, bret enei saa ilun tamal isif, are tamo yãf, to laa fouf. <sup>51</sup> Aya mata ibodōya bret, are saa ilun tamalem isin. Taka ī bret enei yoko, ī mata faimud ibodōf. Bret enei aya bouwau, are teneub ganan bun, tamo kayau mata dalouf nigin afenēdiyof.”

<sup>52</sup> Age ye di, Juda tamo dogo dogol fatuk bagai luwa diroun, “Naig fe fen, tamo enei yogon bouwa ifanada tãf?”

<sup>53</sup> Jesus idi irokenēdin, “Aya ã momoi bagai arokeneik, ã Tamo Naal nē bouwa to wãgauf, in naud to wãgauf are, ã namein mata to ibodok. <sup>54</sup> Taka ī neu bouwau yokon, neu naudou yoko, ī mata faimud ibodkeleya ado, anī aya fau idikeleya naa bun alesnēf. <sup>55</sup> Ere nigin, neu bouwau are saaf bagai, neu naudou are naan bagai. <sup>56</sup> Taka ī neu

---

† 6:45: Asaia 54:13

bouwau yokon, neu naudou yoko, ï aya nameun ibodok, aya ï namen abodok. <sup>57</sup> Mata ibodōya Dei aya sur fiya di, aya Dei bunem mata abodok gen, taka ï aya yōyaf, aya bunem mata ibodōf. <sup>58</sup> Bret enei saa ilun tamal isin. Āgenei tubuī tar mana don are gare desain, anī ere, taka ï bret enei yoko, faimud mata ibodkalauf.” <sup>59</sup> Ī od enei Kapenaum taun an, Juda neid uub fō bun ifelneīd fen, wogō yen.

*In Dō Fiya Tar Musei Jesus Ditornen*

<sup>60</sup> Od enei karī de fen, in dō fiya tar musei diron, “Ifelnadaf eī totol bagai. Aim anī keleī youf?”

<sup>61</sup> In dō fiya tar od enei nigin nauseir de di, Jesus anī keleī ken, idi irokenēdin, “Od enei ā morō ifeneik de? <sup>62</sup> Ba, Tamo Naal ï ibodon nē kel isel mog ulogouf are, ā ere kisi gouf? <sup>63</sup> Awa Uurem mata ifenēdig, bouwa are gorō. Od aya wogō ayein are Uur, od anī mata ifenēdig. <sup>64</sup> Anī ere, ā tunī momoiya sā.” Ere nigin, Jesus idi nigin gariya bun keleīn, aiyaim ï nigin to momoi den, aim ï nigin kiwai inouf. <sup>65</sup> Ī od tobol fe iron, “Anī nigin, aya od enei arokenein, Dei ï nigin wau to yalouf, ï aya bun isiya kisi feleya sā.”

<sup>66</sup> Od enei bunem, in dō fiya tar musei keku den, baban Jesus to dō difiyen.

<sup>67</sup> Jesus in dō fiya tar tuwelf to fedin, “Āg aya utornag ulagauf de?”

<sup>68</sup> Simon Pita solof iron, “Odug, amā ai bun malauf? Ō mata faimud ibodkeleya nē od ado. <sup>69</sup> Amā momoi mau fen, keleī, ō anī Negur nē Fateul.”

<sup>70</sup> Age ye di, Jesus idi irokenēdin, “Tuwelf ā ayam to agirnein de? Anī ere, ā atun taka are Satan.” <sup>71</sup> (Ī Judas, Simon Iskariot naal nigin kisif fen, iron. Idi tuwelf anī taka Judas, fau dum Jesus kiwai ifenen.)

## 7

*Jesus Salafat Nē Sifa Bun Ilen*

<sup>1</sup> Enei dumen, Jesus Galili an iyon, Judia distrik so fiyen, ere nigin, an Juda tamo ï dukesiyouf nigin ololo difen. <sup>2</sup> Anĩ ere, Juda neid Salafat nē Sifa naa melsã di, <sup>3</sup> Jesus tura tarem ï dirokenen, “Õ ein utor ken, Judia ulauf, ago di, ogon dõ fiya tar, memelik uno di, dilouf. <sup>4</sup> Tamo taka ï, tamo kayau meleid bun mala yaor wõ you fenē, ï iminēyan kabĩ to yaledig. Õ eneidi agof, õ ogo tamo kayau ganan ufelnēdiyof.” <sup>5</sup> ï yogon tura tar bagaig, ï nigin to momoi den.

<sup>6</sup> Anĩ nigin, Jesus idi irokenēdin, “Aya neu sain bagai fau isiya sã, ã nigin sain ganan kisi feleya bagai. <sup>7</sup> Tenebur tamo kayau idi, ã to kiwai difeneik, aya nigin kiwai, ere nigin, ereb sane age difef anĩ kurõ afesidig. <sup>8</sup> Æ Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.” <sup>9</sup> Jesus od enei wogõ yel fen, Galili distrik an ibodon.

<sup>10</sup> Anĩ ere, tura tar Sifa bun diselel mog, ïg iselen, anĩ ere, mala yaor sã, iminēyan. <sup>11</sup> Sifa bun, Juda tamo idi, ï nigin meleid dino fen, to difen, “Tamo are nain?”

<sup>12</sup> Tamo kayau atun, ï nigin fatuk bagai kosesē kurã den. Tunĩ diron, “Ï tamo biya.”

Tunĩ solo de diron, “Eo, ï tamo kayau idegnēdidig.” <sup>13</sup> Anĩ ere, taka nem ï nigin yaor to kurõ fesin, ere nigin, idi Juda tamo nigin kumĩ den.

*Jesus Sifa Bun Ifelnēdin*

<sup>14</sup> Sifa mogo atusil ifar mog, Jesus tempel modoũ bun isel fen, od ifelnēdin. <sup>15</sup> Juda tamo idi terē de fen, diron, “Tamo enei tai fiya yaleya sã mog, naig fe fen, keleĩ eig fiya ado?”

<sup>16</sup> Jesus solof iron, “Neu ifelnēya are neu sã, aya sur fiyan ï bunem isif. <sup>17</sup> Taka ï Negur nē oroya dõ fiya nigin orof are, neu ifelnēya Negur bunem isif be, aya neu oroya nem wogõ auf be anĩ, ï keleĩ youf. <sup>18</sup> Taka ï yogon kisim wogõ yef are, ï yogo yana yaleseya nigin age fef, anĩ ere, taka ï sur fiyen nē yana yaleseya nigin kabĩ yalef, tamo are momoi nē. Ì bun idegēya taka sã. <sup>19</sup> Moses lo anĩ to ifenein de? Anĩ ere, ã atun, taka nem lo to dõ fedig. Ere nigin ã aya unakesigouf nigin ago gef?”

<sup>20</sup> Tamo kayau solo de diron, “Õ kaa sane ado. Aim õ inokesiyouf nigin age fef?”

<sup>21</sup> Jesus idi irokenēdin, “Aya memelik taka ano di, ã ganan terē gen. <sup>22</sup> Anĩ ere, Mosesem mulũ ileyã ifenein nigin, ã kesu Sabat naa bun mulũ ileyã wenēgedig (mulũ ileyã are, Moses bunem to isin, teneub te bunem isin). <sup>23</sup> Moses nē lo to wal gouf nigin, Sabat naa bun kesu nē mulũ ileyã wenēgedig, ere nigin aya Sabat naa bun, tamo bou adok el afe di, ã aya nigin nameĩ sanedig? <sup>24</sup> Mala yaor anĩ dogol uleg fen, to es gei, tutuk bagai el ge, es gei.”

### *Jesus Anĩ Kristus De?*

<sup>25</sup> Sain anĩ bun, Jerusalem tamo kayau tunĩ diron, “Tamo enei are idi ï dukesiyouf nigin age difef anĩ sã de? <sup>26</sup> Ì de yeir, mal atun wogõ ye di, ereb od taka to dirokenek. Mudur adodo idi, ï anĩ Kristus ya anĩ mogo tutuk keleĩ de? <sup>27</sup> Anĩ ere, tamo enei nain be tamal, are amã keleĩ. Sain Kristus isiyouf, taka nem ï nainenem be isif to keleĩ youf.”

<sup>28</sup> Age de di, Jesus fau tempel modoũ bun ifelneĩd fen, iweig iron, “Are de, ã aya nigin keleĩ, aya nainenem asin are ã keleĩ. Aya ein neu oroyam to asin, anĩ ere, ï aya sur fiyan are momoi. ã ï keleĩ sã, <sup>29</sup> anĩ ere, aya ï keleĩ, ere nigin, aya ï bun tamal, im aya sur fiyan.”

<sup>30</sup> Od enei bun, idi ã dirounẽf nigin age difen, anĩ ere, taka nem ã bun ima to inon, ere nigin, yogon sain fau isiya sã. <sup>31</sup> Anĩ ere, tamo kayau musei fau ã nigin momoi de fen, diron, “Sain Kristus isiyouf, ã memelik tamo enei inodif anĩ wal fiya inodiyouf de?”

<sup>32</sup> Tamo kayau ã nigin age de, kosesẽ kurã de mog, Farisia tamo idi karĩ den. Age de fen, pris odudug Farisia geid, tempel lo fiya tamo Jesus dalouf nigin sur difedin.

<sup>33</sup> Jesus iron, “Aya ã geid sain modeg tabodok, age afe fen, aya ã aya sur fiyan bun alauf. <sup>34</sup> A aya umirnagauf, anĩ ere, ã to fotou wiyagauf. Aya abodõf nẽ an, ã isiya kisi feleya sã.”

<sup>35</sup> Juda tamo abob dirokenen, “Tamo enei nari bagai ile di, anĩ ada ã to fotou tafouf? Ada neda tamo kayau firagagaũ difen, Grik tamo kayau atun dibodok nẽ an, ã ile fen, Grik tamo kayau ifelnẽdiyof de? <sup>36</sup> Ere gariya nigin ã iron, ‘A aya umirnagauf, anĩ ere, ã to fotou wiyagauf. Aya abodõf nẽ an, ã isiya kisi feleya sã?’”

<sup>37</sup> Sifa naa odug idikeleya bun, Jesus ifar fen, iweig iron, “Taka ã naan ail fouf, aya bun isi fen, naan yãf. <sup>38</sup> Taka ã aya nigin momoi yef, Negur nẽ Itotoya iron kilei, warur naan ã namenem ulo ulõ yef yenẽf.” <sup>39</sup> Ì od enei Awa Uur nigin wogõ yen, are idi Jesus nigin momoi den anidi fau dalouf. Sain anĩ bun, Awa Uur isiya san, ere nigin, Jesus fau fula fiya medeĩa yaleya sã.

<sup>40</sup> Od enei karĩ de fen, tamo kayau tunĩ diron, “Momoi bagai, tamo enei Profet ada tari tafef anĩ.”

<sup>41</sup> Tunĩ diron, “Ì Kristus.”

Tunĩg diron, “Kristus ouf are, naig fe fen, Galilim isiyouf? <sup>42</sup> Kristus Dawid nẽ ibor bunem, Betlehem taun Dawid ibodon nẽ anenem isiyouf, anĩ Negur nẽ Itotoya to irok de?” <sup>43</sup> Anĩ nigin, tamo kayau Jesus nigin fara furu

difen. <sup>44</sup> Tunĩ Jesus ka difiyēf nigin age difen, anĩ ere, taka nem ĩ bun ima to inon.

*Juda Neid Mudur Adodo Momoiya Sã*

<sup>45</sup> Tempel lo fiya tamo idi, pris odudug Farisia tamo gedin keku de dile di, to difedin, “Ere nigin ã ĩ to urou usigel?”

<sup>46</sup> Tempel lo fiya tamo solo de diron, “Taka nem, tamo enei wogō yedig gen to wogō yedig.”

<sup>47</sup> Farisia tamo solo de diron, “Ĩ ãg idegnein de? <sup>48</sup> Mudur adodo Farisia tamo geid atun, taka ĩ nigin momoi yen de? <sup>49</sup> Sã, anĩ ere, tamo kayau eneidi idi lo keleĩ sã, idi Negurem gelu fedif.”

<sup>50</sup> Nikodemus, idi neid taka, tetunem Jesus garan ilen, ĩ irokenēdin, <sup>51</sup> “Ada neda lo bun, taka ĩ ereb age fef anĩ ileyã nigin ketem karĩ tafiye ken, es tafedig. Age fiya sã de?”

<sup>52</sup> Idi solo de diron, “Õg Galili tamal de? Umir ken, fau keleĩ youf, profet taka Galilim to isif.”

*[Itotoya tunĩ kulu bagai od gariya dino fen, ditoton anĩ bun, Jon 7:53-8:11 to ibodok.]*

<sup>53</sup> Age de fen, idi mugu mugu dogo neid fonō fonō dilen.

## 8

<sup>1</sup> Anĩ ere, Jesus Moul Arei bun iselen. <sup>2</sup> Bonimeĩ mumurei ado, ĩ baban tempel modoũ bun wõ yen, an tamo kayau ganã guru de salili difiyē di, ĩ ifelnēdiyof nigin ibodon. <sup>3</sup> Lo ifelnēdiya tamo Farisia tamo geid idi, kayau taka noli ye mog, dale dirou disĩ, guru fiya mala bun dinenē di, ifaren. <sup>4</sup> Age dife fen, Jesus dirokenen, “Tise, kayau enei noli tobonunã ino di, malel. <sup>5</sup> Lo bun, kayau age fediya meein tulu fiya nigin Moses irokanaman. Gama



õ ere wof?” <sup>6</sup> Idi ï bou bun od yũya nigin kor dino fen, age de, to difiyen.

Anĩ ere, Jesus obũ yeis fen, ima gegem teneub bun itoton. <sup>7</sup> Idi ï to difiyẽtu di, ï fã ye, saules fen, irokenẽdin, “Ã atun, aib taka ï mosor sãf, ï ketem kayau bun meein irãf.” <sup>8</sup> Baban ï obũ yeis fen, teneub bun itoton.

<sup>9</sup> Idi od anĩ karĩ de fen, idi mugu mugu ul de, diyalelen, biyedim uyu dirou di, age de dile, Jesus kayau ifaren anĩ ado dogol ditornẽdin. <sup>10</sup> Jesus saules fen, kayau to fiyen, “Kayau, idi nai difef? Idi takam baban õ bun od to yuk de?”

<sup>11</sup> Kayau iron, “Odug, takam to age fef.”

Jesus iron, “Ayag õ boũ bun od to auk. Ule fen, sain enei ilauf ganan, mosor baban to uno.”

### *Jesus Nẽ Wogõya Are Momoi*

<sup>12</sup> Jesus baban tamo kayau irokeneĩd fen, ï iron, “Aya tenebur enei nẽ fula fiya. Taka ï aya dõ fiyau, ï gugum namen to bagai iyõf, anĩ ere, ï mata nẽ fula fiya adouf.”

<sup>13</sup> Age ye di, Farisia tamo idi Jesus dirokenen, “Õ ogo nigin wogõ wof, anĩ nigin, ogon wogõya are, momoi be sã be anĩ yaor sã.”

<sup>14</sup> Jesus solof irokenẽdin, “Aya yug nigin wogõ auf, anĩ ere, neu wogõya are momoi, ere nigin, aya nainenem asin, nain be alauf anĩ, aya keleĩ. Anĩ ere, ã, aya nainenem asin, nain be alauf anĩ, keleĩ sã. <sup>15</sup> Ã tamo nẽ tobonunã bunem es gedig, aya aib taka to es afedig. <sup>16</sup> Anĩ ere, aya es afouf are, neu es fiya are tutuk, ere nigin, aya mugu sã. Aya Dei inim sur fiyan ado mafaref. <sup>17</sup> ãgenei Lo bun itotoya irok, tamo urom wogõ tekelei dinof, are momoi. <sup>18</sup> Aya yug nigin kurõ afalaisidig, age afe di, Dei aya sur fiyan ï, aya nigin kurõ fesidig.”

<sup>19</sup> Age ye di, idi Jesus dirokenen, “Õ tamã nain?”

Jesus solof iron, “Ã aya nigin ado neu Dei nigineg keleĩ sã. Ã aya nigin keleim are, neu Dei nigineg keleim.” <sup>20</sup> Ñ tempel bun kolekta inoya nẽ modoũ non ifelneĩd fen, od enei wogõ fiyẽdin. Anĩ ere, takam ã to ima ka fen, ere nigin, in sain fau isiya sã.

<sup>21</sup> Jesus baban idi irokenẽdin, “Aya atorneĩ di, ã umir-nagauf, agog fen, ã ãgenei mosor bun gare gouf. Aya elef nẽ an, ã isiya kisi feleya sã.”

<sup>22</sup> Anĩ bunem, Juda tamo idi diron, “Ñ yogo bouwa yukesiyouf de? Anĩ nigin, ã, ‘Aya elef nẽ an, ã isiya kisi feleya sã,’ yef de?”

<sup>23</sup> Anĩ ere, Jesus tobol fe fen, irokenẽdin, “Ã tenebur temeĩ, aya ilun temelou. Ã teneub enei nẽ, aya teneub enei nẽ sã. <sup>24</sup> Anĩ nigin, aya, ã ãgenei mosor bun gare gouf ayein. Aya yug nigin, aya im audig anĩ, to momoi gouf are, ã momoi bagai ãgenei mosor bun gare gouf.”

<sup>25</sup> Age ye di, idi ã to difiyen, “Õ ai?”

Jesus idi irokenẽdin, “Aya aib anĩ, mogo gariya bunem arokeneik asin. <sup>26</sup> Aya ã nigin wogõya musei ado, es fiya nigineg musei. Anĩ ere, sur fiyan ã, momoi bagai, anĩ nigin, erab aya ã bun karĩ aun anĩ, tamo kayau tenebur ein arokenẽdif.”

<sup>27</sup> Idi, ã Tama nigin irokenẽdif ya anĩ, to kisi fokõ yen.

<sup>28</sup> Anĩ nigin, Jesus iron, “Sain ã Tamo Naal walesagauf bun, aya yug nigin aya im audig anĩ, ã keleĩ youf, aya neu oroyam erab taka to age afedig, anĩ ere, aya Dei ifelnan anĩ dogol wogõ audig anĩ, ã keleĩ youf. <sup>29</sup> Aya sur fiyan ã, amã urom mabodok, ã mugu to itornal, ere nigin, aya faimud, erab ã wau al fouf anĩ, age afedig.” <sup>30</sup> Age wogõ ye di, musei ã nigin momoi den.

<sup>31</sup> Jesus, Juda tamo ĩ momoi difiyen anidi irokenēdin, “Aya afelnein anĭ uroug tokō walagauf are, ā momoi bagai neu dō fiya tar. <sup>32</sup> Agog fen, ā momoi anĭ keleĭ youf, momoi anim kafĭ fiya bun tamal yalelneĭf.”

<sup>33</sup> Idi aiten dale dirokenen, “Amā Abraham nē ibor nē tubu tar, amā aib taka nē ferfer to mabodon. Ere wo fen, amā kafĭ fiya bun tamal yalelnamāya nigin urok?”

<sup>34</sup> Jesus aitedin yale iron, “Aya ā momoi bagai arokeneik, taka ĩ mosor inof are, ĩ mosor nē ferfer. <sup>35</sup> Ferfer ĩ, ibor anĭ bun gai ibodkeleya modoũ sã, anĭ ere, modoũ are naal nē faimud ibodkalauf. <sup>36</sup> Anĭ nigin, Naal ĩ kafĭ fiya bun tamal yalelneĭf are, ā momoi bagai karika lauf. <sup>37</sup> Ā Abraham nē ibor nē tubu tar are, aya keleĭ. Anĭ ere, ā aya unakesigouf nigin dodok gef, ere nigin, ā neu od nē modoũ namein to ibodok. <sup>38</sup> Ereb aya Dei mala bun ailen anĭ, aya ā arokeneik, āg ereb āgenei temeĭ bun karĭ gen anĭ ago gedig.”

<sup>39</sup> Idi aiten dale dirokenen, “Abraham ĩ tamamã.”

Age de di, Jesus iron, “Ā Abraham gere tarem are, Abraham age fedin anĭ ago gem. <sup>40</sup> Gama ā, aya Negur bun momoi anĭ karĭ au fen, arokenein anĭ, unakesigouf nigin naab umirēgef. Abraham ĩ to age fen. <sup>41</sup> Ā temeĭ age fedig anĭ ago gef.”

Age ye di, idi Jesus dirokenen, “Amā seseirã inoya naab bun temelamã sã. Nemã Tamamã are Negur yogo dogol.”

### *Satan Gere Tar*

<sup>42</sup> Jesus idi irokenēdin, “Negur ĩ Temeim are, ā aya nigin wauĭ laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan. <sup>43</sup> Ere nigin neu od nigin wauĭ to fokō yef? Are aya wogō auf anĭ, ā karĭya kisi feleya sã nigin. <sup>44</sup> Ā, temeĭ Satan nē, anĭ nigin, ā temeĭ nē oroya dō fiya nigin oroyeik. ĩ gariya bunem isin, ĩ yukesiya kaa, momoi to iroudig, ere nigin, ĩ namen

momoi sã. Ereb sain ï idegẽya od wogõ yedig, ï yogon od bagai wogõ yedig, ere nigin, ï kori tamal, idegẽya tama. <sup>45</sup> Anĩ ere, aya momoi anĩ wogõ audig nigin, ã to momoi wiyagedig! <sup>46</sup> ã takam, aya neu mosor anĩ tau kurõ fesiya kisi feleya? Aya momoi wogõ auf are, ere nigin ã to momoi wiyagef? <sup>47</sup> Aib ï Negur nẽ, ï Negur ereb yef anĩ karĩ yedig. ã to karĩ gef anĩ nẽ gariya are, ã Negur nẽ sã nigin.”

### *Jesus Yogo Nigin Iron*

<sup>48</sup> Juda tamo aiten dale dirokenen, “Amã õ Samaria tamal, kaa sanem ironon mauf are, momoi to morok de?”

<sup>49</sup> Jesus solof iron, “Aya kaam to ironan, anĩ ere, aya neu Dei yana seli abidig, ã aya selu to wabigedig. <sup>50</sup> Aya yug nigin fula fiya medeĩa to amirek, anĩ ere, taka ï anĩ imirek are ibodok, ï anĩ es fiya tamo. <sup>51</sup> Aya ã momoi bagai arokeneik, taka ï neu od irou kafĩ falauf are, ï laa to bagai gurug fouf.”

<sup>52</sup> Juda tamo, anĩ bun Jesus dirokenen, “Gama amã keleĩ, õ kaa sanem ironon! Abraham laa fen, profeteg gare den, anĩ ere, õ, taka ï ogon od irou kafĩ falauf are, ï laa to bagai kobũf ilouf, wof. <sup>53</sup> Õ tamamã Abraham wal fiya de? ï laa fen, profeteg age difen. Õ kisi wof, õ ai?”

<sup>54</sup> Jesus aitedin yale iron, “Aya yug selu alesauf are, neu seli alef are ege. Neu Dei, ï anĩ ãgenei Negur gef, ï aya yanau yalesedig. <sup>55</sup> ã ï keleĩ sã, anĩ ere, aya ï keleĩ. Aya ï keleĩ sã auf are, aya ã gen idegẽya tamouf, anĩ ere, aya ï keleĩ bagai, in od dõ afedig. <sup>56</sup> Temeĩ Abraham ï, neu naa anĩ ilouf nigin kisif fen, wau al fen. ï anĩ mogo ile fen, kulĩ yen.”

<sup>57</sup> Anĩ nigin, Juda tamo Jesus dirokenen, “Õ fau yar fifti yaleya sã, anĩ õ mogo Abraham ulen de?”

<sup>58</sup> Jesus idi irokenẽdin, “Aya ã momoi bagai arokeneik, Abraham gõ fiya sã mog, aya abodon.” <sup>59</sup> Anĩ nigin, idi

ĩ meein tulu difouf nigin meein gei difen, anĩ ere, Jesus bouwa inokel fen, tempel modoũ bun tamal iya ilen.

## 9

### *Jesus Tamo Taka Mala Ifofakeleya Gõ Difiyen Anĩ El Fiyen*

<sup>1</sup> Jesus iyok ile fen, tamo taka mala ifofakeleya gõ difen anĩ ilen. <sup>2</sup> In dõ fiya tar Jesus to difiyen, “Rabi, aim mosor ino di, ã mala ifofakeleya gõ difen, tamo enei yogo de, sina tamam de?”

<sup>3</sup> Jesus aitedin yale iron, “Tamo eneimeg sã, sina tama adomeg sã, anĩ ere, Negur nẽ kabĩ ã bunem yaorouf nigin eig fiya wõ yen. <sup>4</sup> Eĩ fau gaa ado, aya sur fiyan in kabĩ talouf bagai. Bõ fau isif, sain anĩ, taka nem kabĩ yaleya kisi feleya sã. <sup>5</sup> Sain aya tenebur abodok, aya teneub enei nẽ fula fiya.”

<sup>6</sup> Age wogõ yel fen, ã tenebur isis fen, salina buru ado falei fe fen, tamo mala bun inon. <sup>7</sup> Jesus ã irokenen, “Ule, Siloam naan kukor ugũ” (Siloam nẽ gariya, are ‘Sur fiyen’). Anĩ nigin, tamo ile, naan igun, agef fen, mala kelẽ yel, fõ bun isin.

<sup>8</sup> In fõ tura tar ado, idi ã nonĩ ye mog diledig anidi diron, “Tamo de eneim ibod ken, nonĩ yedig anĩ sã de?” <sup>9</sup> Idi tunĩ diron, “Im.”

Tunĩ diron, “Im sã, taka ã genem.”

Anĩ ere, ã yogo iron, “Aya de tamo anim.”

<sup>10</sup> Idi ã dirokenen, “Naig fe di, õ malã kelẽ yeledin?”

<sup>11</sup> ã aitedin yale iron, “Tamo yana Jesus dedig im, buru falei fe fen, malau uru bun inodin. ã, aya ele, Siloam naan agũf nigin irokanan. Anĩ aya ele, naan agun, age afe fen, aya malau kelẽ aun.”

<sup>12</sup> Idi ã to difiyen, “Tamo are nain?”

ã iron, “Aya keleĩ sã.”

*Farisia Tamo Idi Mala El Fiyen Nē* Gariya Dimiren

<sup>13</sup> Idi tamo mala ifofakelen anī, Farisia tamo gedin dale dirou disin. <sup>14</sup> Jesus buru falei fe fen, tamo mala el fedin nē naa are Sabat naa. <sup>15</sup> Anī nigin, Farisia tamo idig, ī naig fe fen, mala kelē yedin anī to difiyen. Tamo are irokenēdin, “Ī malau buru inodin, age fe di, agun, anī aya gama kelē auf.”

<sup>16</sup> Farisia tamo tunī diron, “Tamo enei Negur bun tamal sã, ere nigin, ī Sabat naa to dō fef.”

Anī ere, tunī diron, “Naig fe di, mosor tamo memelik age fediya inoya kisi feleya?” Anī nigin, idi fara difen.

<sup>17</sup> Idi baban tamo mala ifofakelen anī dirokenen, “Ī ō malã el fen anī, ō ĩ nigin ere wof?”

Age de di, ĩ iron, “Ī profet.”

<sup>18</sup> Juda tamo idi, tamo mala ifofakeleya mala kelē yelen anī, fau to momoi den. Anī nigin, idi tamo anī sina tama diweignēdin. <sup>19</sup> Idi to difen, “Eī ã naaluī de? De ĩ anī mala ifofakeleya gō mafen gef? Naig fe di, ĩ gama sã mala kelē yelef?”

<sup>20</sup> Sina tama diron, “Amã keleī, ĩ nemã kesu, anī ĩ mala ifofakeleya gō mafen. <sup>21</sup> Anī ere, ĩ naig fe fen, gama sã lo fef, aim ĩ mala el fedin anī, amã keleī sã. Yogo to wiyēg, ĩ biya, yogo nigin wogō youf.” <sup>22</sup> Sina tama idi, Juda tamo kumī difiyeīd fen, age de diron, ere nigin, Juda tamo idi mogo od difon, aib taka Jesus anī Kristus youf are, Juda neid uub fō bun dalelnēf. <sup>23</sup> Age fiya nigin, sina tama eig de diron, “Ī biya, yogo to wiyēg.”

<sup>24</sup> Baban Juda tamo idi, mala ifofakelen anī diweigne ken, diron, “Negur yana wales fen, momoi nē od dogol urōf, amã keleī, tamo are mosor tamal.”

<sup>25</sup> Ī solof iron, “Ī mosor ado be sã be, aya keleī sã. Tekelei aya keleī are, aya malau ifofakelen, anī ere, gama lo afedig.”

<sup>26</sup> Age ye di, idi ĩ to difiyen, “Ī ō ere naig yon? Naig fe di, ō malā birikā fedin?”

<sup>27</sup> Ī aitedin yale iron, “Aya ā mogo arokenein, anī ere, ā to karī gen. Ere nigin ā baban karī gou fenē? Āg in dō fiya tar wowā gou fenē de?”

<sup>28</sup> Age ye di, idi kono difiye ken, diron, “Ō tamo enei nē dō fiya taka! Amā are Moses nē dō fiya tar! <sup>29</sup> Negur Moses wogō fiyen are amā keleī, anī ere, tamo enei nigin, ĩ nainenem isin areg, amā keleī sã.”

<sup>30</sup> Tamo anī aitedin yale irokenēdin, “Ago ge di, terē auf. Ī nainenem isin, ā keleī sã, anī ere, aya malau birikaū fedin. <sup>31</sup> Amā keleī, Negur ĩ mosor dinodidig anī to karī fiyēdidig, anī ere, taka ĩ Negur anini fiye ken, Negur nē oroya dō fef are, Negurem ĩ karī fiyēdig. <sup>32</sup> Gariya bunem isi gama, taka nem, tamo mala ifofakeleya gō difen anī birikā fedin yeya to karī yedig. <sup>33</sup> Tamo enei Negur bun tamal sam are, ĩ ereb taka to naig fem.”

<sup>34</sup> Age ye di, idi diron, “Ō mosor barikā gō diyon, naig fe di, ō amā ufelnamak?” Age de fen, idi ĩ mayarē diru dirā di, isin.

### *Uur Bun Mala Ifofakeleya*

<sup>35</sup> Jesus, idi tamo anī serē diran yeya anī karī yen. Jesus ĩ fotou fiye ken, iron, “Ō Tamo Naal nigin momoi wof de?”

<sup>36</sup> Tamo to fen, “Odug, ai anī ĩ? Urokana di, aya ĩ nigin momoi auf.”

<sup>37</sup> Jesus iron, “Ō gama ĩ ulel, de ĩ anī urom wogō gef.”

<sup>38</sup> Age ye di, tamo iron, “Odug, aya momoi auf.” Agef fen, ĩ Jesus seli yabin.

<sup>39</sup> Jesus iron, “Es fiya nigin aya tenebur ein asin, are mala ifofakeleya meleid kelē youf, age fe di, idi meleid kelē yef, are meleid ifofakalauf nigin.”

<sup>40</sup> Farisia tamo tunĩ Jesus geid difaren anĩ, agef wogõ ye di, karĩ de fen, to difen, “Ere? Amãg malamã ifofakeleya de?”

<sup>41</sup> Jesus iron, “Ã momoi bagai meleĩ ifofakeleyam are, ã mosor sam, anĩ ere, gama ã malamã kelẽ yef gef, anĩ nigin, ãgenei mosor fau ibodok.

## 10

### *Sipsip Lo Fiya Tamo Yogon Sipsip Geid*

<sup>1</sup> “Aya momoi bagai arokeneik, tamo taka ã, sipsip nẽ kauwor bobog bunem to ilauf, anĩ ere, naab taka bunem gar ye isilaufer are, ã bẽ tamo, bẽ yaledig. <sup>2</sup> Tamo ã bobog bunem ilef are, ã yogo sipsip marau. <sup>3</sup> Lo fedig tamo ã bobog kãf kenẽdidig, age fe di, sipsip ã ait karĩ dedig. ã yogon sipsip yana yaleid fen, mayarẽ guri feid, irouledig. <sup>4</sup> Sain ã yogon ganan mayarẽ guri feid iroule fen, ã ketem uyu iledig, age fe di, yogon sipsip dõ difedig, ere nigin, idi yogon ait keleĩ. <sup>5</sup> Anĩ ere, idi tamo urug to dõ difedig, idi ã mã diyawauf, ere nigin, ã ait urug nigin idi keleĩ sã.” <sup>6</sup> Jesus yaab od enei nem wogõ fiyẽdin, anĩ ere, ã idi ereb gariya nigin irokenẽdin anĩ, idi to kelein.

<sup>7</sup> Anĩ nigin, Jesus baban iron, “Aya ã momoi bagai arokeneik, aya sipsip neid bobog. <sup>8</sup> Ganan uyulil disin are, idi bẽ tamo, bẽ daledig, anĩ ere, sipsip idi to karĩ difiyẽdin. <sup>9</sup> Bobog are aya, taka ã aya bunem isiyouf are, mata kel yalouf. ã namen isi fen, ulõ yeis ilauf, agef fen, fisir yõya nẽ fotou fouf. <sup>10</sup> Bẽ tamo are bẽ nigin, yukesiyouf nigin ado, narĩ fouf nigin dogol isif, aya idi mata dale fen, barikãuf nigin asin.

<sup>11</sup> “Aya sipsip lo fiya tamo biya, sipsip lo fiya tamo biya, yogon mata sipsip nigin itorõdig. <sup>12</sup> Oroi tamo are ã sipsip marau sã. Anĩ nigin, ã gaũ kuĩ isi di, ile fen, sipsip itorarã iyadig. Age fe di, gaũ kuĩ sipsip kaka feid fen, firagagaũ



fedidig. <sup>13</sup> Tamo are iyadig, ere nigin, ï oroi tamo, sipsip nigin to karĩ yedig.

<sup>14</sup> “Aya sipsip lo fiya tamo biya, aya neu sipsip keleĩ, neu sipsip idi aya keleĩ, <sup>15</sup> are Dei ï aya keleĩ, aya Dei keleĩ gen. Anĩ nigin, aya neu mata sipsip nigin atorok. <sup>16</sup> Aya sipsip tunĩ ado, are sipsip kau enei bun temeleid sã, aya idig de guri afeid, arou asiyouf. Idig aitou karĩ douf, age fe di, idi uũ tekelei, sipsip lo fiya tamo tekelei youf. <sup>17</sup> Neu Dei, aya nigin wau laa fef nẽ gariya are, aya neu mata baban kel yalouf nigin anĩ atorok. <sup>18</sup> Taka nem neu mata to son fiyauf, anĩ ere, aya neu oroyam neu mata atorok. Aya neu mata itorõya nigin megeir ado, kel yaleya nigineg megeir ado. Od enei neu Dei bun tamal alen.”

<sup>19</sup> Juda tamo od enei nigin baban fara difen. <sup>20</sup> Musei idi diron, “Ï kaa sane ado, agef fen, wadak. Ere nigin ï karĩ wiyẽgef?”

<sup>21</sup> Anĩ ere, tunĩ diron, “Wogõya enei are, tamo kaa sane ado nẽ sã. Kaa sane ï mala ifofakeleya birikã feleya kisi feleya de?”

### *Juda Tamo Idi To Momoi Den*

<sup>22</sup> Sain anĩ bun, Negur bun Kel Inoya nẽ Sifa naa Jerusalem wõ yen. Are saneya sain. <sup>23</sup> Anĩ Jesus tempel modoũ bun, Solomon nẽ Waranda dõ fef iyon. <sup>24</sup> Juda tamo guru de, Jesus salili difiye ken, dirokenen, “Sain ganĩ amã lo wamã di, nene mauf? Õ Kristus ouf are, amã el wo, faded wamãf.”

<sup>25</sup> Jesus aitedin yale irokenẽdin, “Aya mogo arokenein, anĩ ere, ã to momoi gef. Memelik neu Dei yana nem anodif, are aya nigin irok. <sup>26</sup> Anĩ ere, ã to momoi gef, ere nigin, ã neu sipsip sã. <sup>27</sup> Neu sipsip aya aitou karĩ dedig, aya idi keleĩ, anĩ nigin, idi aya dõ difiyadig. <sup>28</sup> Aya idi mata faimud ibodkeleya afenẽdidig, age afe di, idi to bagai inanakalauf. Takam idi imaun tamal to sosoin fiyauf.

<sup>29</sup> Neu Dei idi aya ifanan ĩ, ereb ereb ganan wal fiya. Takam idi neu Dei ima bun tamal son fiya kisi feleya sã. <sup>30</sup> Aya Dei ado tekelei.”

<sup>31</sup> Juda tamo baban ĩ meein tulu difiyēf nigin, meein gei difen. <sup>32</sup> Anĩ ere, Jesus idi irokenēdin, “Aya Dei bun tamal, ã memelik odudug musei afelnein. Anidi atun nanĩ anĩ nigin, ã aya meein tulu wiyagau fenē?”

<sup>33</sup> Juda tamo aiten dale diron, “Amã anidi taka nigin meein to tulu mayōf, anĩ ere, Negur kono fiya nigin, ere nigin, õ tamo maug anĩ, ‘aya Negur’ wof.”

<sup>34</sup> Jesus idi aitedin yale irokenēdin, “Ãgenei Lo bun itotoya anĩ to ibodok de, ‘Aya aron, ã waitou’\*? <sup>35</sup> Negur nē od idi bun isin are, Negur idi anĩ waitou yen. Negur nē Itotoya are narĩ fiya kisi feleya sã. <sup>36</sup> Age yen ouf are, Dei yogon bagai igrna fen, ein tenebur sur fiyan anĩ, aya Negur Naal aul anĩ, ere nigin aya kono afel wiyagef? <sup>37</sup> Aya ereb neu Dei age fedig anĩ, to age afef are, aya to momoi wiyagauf. <sup>38</sup> Anĩ ere, aya age afe di, ã neu od to momoi goufeg, memelik anodif anĩ momoi gouf, anĩ bunem Dei aya bun ibodok, aya Dei bun abodok ya anĩ, ã karīg fen, keleĩ youf.” <sup>39</sup> Idi baban Jesus ka difiyēf nigin age difen, anĩ ere, ĩ oreis iyawon.

<sup>40</sup> Agef fen, Jesus ĩ, Jordan naan sitakã, uruwa bun Jon naan igunēdin modoũ bun, kel ile, an ibodō di, <sup>41</sup> tamo kayau musei ĩ garan disi diron, “Jon memelik taka to inon, anĩ ere, Jon tamo enei nigin wogō yen ganan, are momoi.”

<sup>42</sup> Age de fen, an musei idi Jesus nigin momoi den.

## 11

### *Lasarus Laa Fen*

---

\* **10:34:** Sam 82:6: Negur ĩ od enei Juda nē es fiya tamo ifenēdin.

<sup>1</sup> Gama tamo Lasarus dedig dagin. Ì Betani tamal, Maria ì tura Marta ado neid fonõ. <sup>2</sup> Maria de anim, kulu moul sumeĩ biya ado, Jesus bun fi fel fen, fatiyam Jesus ye wã fen. Ì main Lasarus gama dagi yenek. <sup>3</sup> Anĩ nigin, main tar Jesus garan od sur difen, “Odug, ì nigin waũ laa fedig are dagi.”

<sup>4</sup> Jesus ì enei karĩ ye fen, iron, “Dagi eneim to laa ilauf, are Negur nẽ fula fiya medeĩya nigin, anĩ bunem, Negur Naal yana dalesauf.” <sup>5</sup> Marta, tura ado, maineid Lasarus nigin, Jesus wau laa fen. <sup>6</sup> Anĩ ere, Jesus ì Lasarus dagi yenek ya karĩ ye fen, ì ibodon nẽ an baban naa uru ibodon.

<sup>7</sup> Anĩ bure fele di, Jesus in dõ fiya tar irokenẽdin, “Ada Judia distrik baban keku tagauf.”

<sup>8</sup> Anĩ ere, idi diron, “Rabi, õ gama bagai Juda tamo meein tulu diyõf nigin age difen, anĩ õ an kel ulau fenẽ de?”

<sup>9</sup> Jesus irokenẽdin, “Gaa tekelei bun aua tuwelf to ado de? Anĩ ege aa luwan to ilalauf. Tamo ì gaa ado iyok, ì ye to tũ fedig, ere nigin, ì teneub enei nẽ lalan anim lo fedig. <sup>10</sup> Sain ì bõ iyõf are, ye tũ fouf, ere nigin, ì lalan sã.”

<sup>11</sup> Enei irokel fen, Jesus idi irokenẽdin, “Neda mou Lasarus ì mulã yenek, anĩ ere, aya turĩ afiyẽf nigin an elef.”

<sup>12</sup> In dõ fiya tar Jesus solo de dirokenen, “Odug, ì yenek are, ì fau karikauf.” <sup>13</sup> Lasarus laa fen nigin Jesus iron, anĩ ere, in dõ fiya tar kisi difen, ì mulã yenẽya maug bagai nigin irok den.

<sup>14</sup> Anĩ nigin, Jesus idi faded feid, irokenẽdin, “Lasarus laa fen. <sup>15</sup> Ì nigin au fen, aya an to abodon anĩ nigin, aya wau al fef, ere nigin, anĩ bunem ã momoi gouf. Anĩ ere, ada ì gein talauf.”

<sup>16</sup> Anĩ nigin, Tomas Didimus dedig, dõ fiya tar tunĩ ganan irokenẽdin, “Weim gare tauf nigin, adag talauf.”

*Jesus Lasarus Main Tar Waud Wã Fen*

<sup>17</sup> Sain Jesus ile wõ yen are, Lasarus mogo matmat bun naa fo ilelen anĩ karĩ yen. <sup>18</sup> Betani are Jerusalem melsã, tri kilomita age fiya. <sup>19</sup> Juda tamo kayau musei, Marta Maria ado maineid laa fen anĩ, waud yo difouf nigin idi gedin disin. <sup>20</sup> Marta Jesus isif ya karĩ ye fen, Jesus fotou fouf nigin ilen, anĩ ere, Maria ã fõ bun ibodon.

<sup>21</sup> Marta Jesus irokenen, “Odug, õ ein udobom are, mainou to laa fem. <sup>22</sup> Anĩ ere, aya keleĩ, gamag õ ereb taka nigin Negur urokenẽf are, ifonõf.”

<sup>23</sup> Jesus Marta irokenen, “Nẽ main baban kel fã youf.”

<sup>24</sup> Marta Jesus aiten yale iron, “Aya keleĩ, idikeleya naa kel fãya sain bun, ã baban kel fã youf.”

<sup>25</sup> Jesus ã irokenen, “Aya dogol kel fãya nẽ ado mata nẽ. Taka ã aya nigin momoi yef are, ã mata ibodõf, laa foufeg, ã mata ibodõf. <sup>26</sup> Taka ã mata ibod ken, aya nigin momoi yef are, ã to bagai laa fouf. Õ enei momoi wof de?”

<sup>27</sup> Marta Jesus irokenen, “Momoi, Odug, aya momoi auf, õ Kristus, Negur Naal, teneub enei bun usin.”

<sup>28</sup> ã agef irokel fen, ã kel ile, tura Maria iweigne ken, mugun irokenen. ã iron, “Tise yeir, ã iweignok.” <sup>29</sup> Maria od enei karĩ ye fen, ã kaisã bagai fã yale, Jesus garan ilen. <sup>30</sup> Jesus fonõ wõya sã, ã fau Marta fotou fiyen modoũ anĩ bun ibodon. <sup>31</sup> Juda tamo kayau, Maria geid, fõ bun dibod ken, ã wau wã difenen, ã kaisã bagai fã yale, ulõ yeis ile di, dile fen, ã matmat bun inã yalouf nigin ilef de fen, dõ difiyen.

<sup>32</sup> Sain Maria Jesus ibodon nẽ modoũ anĩ bun wõ ye, Jesus ile fen, ã ye gariyan kubũ ye fen, iron, “Odug, õ ein ubodom are, mainou to laa fem.”

<sup>33</sup> Sain Maria inã yalen ado, Juda tamo kayau Maria geid disin idig inã dalen, Jesus anĩ ile fen, wau fatuk bagai gudũf morõ fen. <sup>34</sup> Jesus to fen, “ã nain mũ gen?”

Idi diron, “Odug, usi fen, ule.”

<sup>35</sup> Jesus ï inã yalen.

<sup>36</sup> Age fe di, Juda tamo kayau diron, “Ulegef, ï nigin fatuk bagai wau laa fen anĩ!”

<sup>37</sup> Anĩ ere, idi tunĩ diron, “Ĩ tamo mala ifofakeleya birikã fedin, tamo eneig laa bun ileyã nigin katĩ feleya to kisi feleyan de?”

*Jesus Lasarus Laa Bun Tamal Turĩ Fen*

<sup>38</sup> Jesus baban wau fatuk bagai gudũf fen, matmat bun isin. Matmat are ku, meein nem bobog katĩ difelen.

<sup>39</sup> Jesus iron, “Meein waleleg.”

Marta, laa tamo nẽ main iron, “Anĩ ere, Odug, are gama waai sane, ere nigin, ï an naa fo ibodon.”

<sup>40</sup> Age ye di, Jesus iron, “Õ momoi wof are, Negur nẽ fula fiya medeĩya ulouf, to age ayon de?”

<sup>41</sup> Anĩ nigin, idi meein are dalelen. Age dife di, Jesus itad fen, iron, “Dei, õ aya karĩ wiyal nigin, õ de ayok. <sup>42</sup> Aya kelein, õ faimud aya karĩ wiyadig, anĩ ere, aya tamo kayau yeir difaref nigin od enei orom, are idi onom aya sur wiyã anĩ momoi douf nigin.”

<sup>43</sup> Jesus od enei wogõ yel fen, ait odug nem iwegin, “Lasarus, ulõ weis!” <sup>44</sup> Laa tamo, ye, ima gabar masak nem filu difen ado, nawa gabarem sile difen ulõ yesi di,

Jesus idi irokenẽdin, “Gabar waleleg fen, utornẽge di, ile.”

*Jesus Dukesiyouf Nigin Od Difon*

*(Matyu 26:1-5; Mak 14:1, 2; Luk 22:1, 2)*

<sup>45</sup> Anĩ nigin, Juda tamo kayau musei Maria gein disin, Jesus ereb age fen anĩ dile fen, ï nigin momoi den. <sup>46</sup> Anĩ ere, idi tunĩ Farisia tamo gedin dile fen, Jesus ereb age fen anĩ dirokenẽdin. <sup>47</sup> Anĩ nigin, pris odudug Farisia tamo geid, katõ difouf nigin Juda uyu irouya neid kaunsel guru fiya diwegin.

Idi diron, “Ada naig tafouf? Ere nigin, tamo enei memelik musei inodif. <sup>48</sup> Ada lo tafe di, ï enei eig fef ilauf are, tamo ganan ï nigin momoi douf, age dife di, neda ibodōya ado teneub, Rom tamom disi dalouf.”

<sup>49</sup> Age de di, idi atun taka, yana Kaiafas, ï yar anï bun pris neid mudur ibod ken, wogō yen, “Ä ereb taka keleï sä! <sup>50</sup> Tamo kayau ganan inanakalauf ban, tamo tekeleim tamo kayau nigin laa fouf, are ã nigin deuf anï, ã to kisi gef.”

<sup>51</sup> ï yogon kisi bunem od enei to iron, anï ere, ï yar anï bun pris neid mudur ibodon nigin, profet od wogō yen, Jesus Juda tamo kayau ganan nigin laa fouf yen. <sup>52</sup> Are Juda tamo kayau nigin dogol sä, Negur gere tar firagagaũ difen anidig, guri feid ırousi kuru fedı di, idi tekelei youf nigin, Jesus laa fouf yen. <sup>53</sup> Anï nigin, naa anï bunem ilen, idi Jesus dukesiyouf nigin naab dimiren.

<sup>54</sup> Age dife di, Jesus ï, Juda tamo kayau meleid bun mala yaor to iyon, ï an iminkele fen, teneub akor taka, gerere tuan melsã, fonō yana Efraim ilen, an yogon dō fiya tar geid dibodon.

<sup>55</sup> Sain anï Juda neid Pasa naa melsã, musei fonō fonō temeleid, dogo neid nonorou lilik fiya nigin, Pasa naa wōya sä mog, Jerusalem diselen. <sup>56</sup> Idi Jesus nigin meleid dinof diyon. Idi tempel modoũ bun difar fen, abob to difen, “Ä ere kisi gef? ï Sifa bun to isiyouf de?” <sup>57</sup> Anï ere, pris odudug Farisia tamo geid, taka nem Jesus nain be ibodok ya anï ile fen, ırokenēdi di, dirounēf nigin wedereid diroun.

## 12

*Betani Oun Jesus Ye Bun Maria Moul Fi Felen  
(Matyu 26:6-13; Mak 14:3-9)*

<sup>1</sup> Pasa nē naa wōya nigin, naa sigis fau ibod mog, Jesus Betani wō yen, an Lasarus ibodon, ī Jesusem laa bun tamal turī fiyen. <sup>2</sup> An Jesus nigin waud el fe fen, bō saaf dabin, anī Marta aruna yalen. Idi Jesus geid tebol bun dibodon atun, Lasarus ibodon. <sup>3</sup> Age de mog, Maria moul sumeī biya, hap lita nad nem dinon, are moni odug nē anī yale fen, Jesus ye bun fi fel fen, fatiyam ye waī fen. Age fe di, moul sumeī biyam, fō anī ino yalen.

<sup>4</sup> Anī ere, Judas Iskariot, in dō fiya taka, fau dum im Jesus kiwai imeid bun inouf, im iron, <sup>5</sup> “Ere nigin moul sumeī biya enei, na nigin sur fe fen, moni anī maleg tamo to ifenēdiyam? Are yar tekelei bun, kabī tamo nē mala yaledig kilei.” <sup>6</sup> Ī maleg tamo nigin kisif fen, enei to iron, ī yogo bē tamo nigin age yen. Ī moni nē kodol lo fiya tamo, moni nē kodol bun dinodig are bē yaledig.

<sup>7</sup> Anī nigin, Jesus iron, “Kayau are utornēg, ī aya mū difiyauf naa nē nigin, moul sumeī biya enei irouwauf. <sup>8</sup> Maleg idi, ā geid sain faimud ubodōgouf, anī ere, aya, ā geid sain faimud to tabodōf.”

<sup>9</sup> Age de mog, Juda tamo kayau musei, Jesus an ibodok ya kelei ken, disin, are ī nigin dogol sã, Lasarus Jesusem laa bun tamal turī fiyen ĩg dilouf nigin. <sup>10</sup> Anī nigin, pris odudug Lasarus ĩg dukesiyouf nigin naab dimiren, <sup>11</sup> ere nigin, Lasarus bunem, Juda tamo kayau musei Jesus garan dile fen, ī nigin momoi den.

*Jesus Tamo Yana Ado Gen Jerusalem Ilen  
(Matyu 21:1-11; Mak 11:1-11; Luk 19:28-40)*

<sup>12</sup> Naa anī ile di, tamo kayau musei Sifa bun disin, Jesus Jerusalem isif ya anī karī den. <sup>13</sup> Idi pam aarau anā aarau gen anī guri de, Jesus tarabã difiyēf nigin dile fen, diweig diron,

“Hosiana!\*

“Odug yana bunem isif, ã el fiya ado!”†

“Israel neid King, ã el fiya ado!”

<sup>14</sup> Jesus donki naal fotou fe fen, teten ibodon, are Negur nē Itotoya eig ye irok kilei,

<sup>15</sup> “To kumĩg, Saion nē tamo kayau, uleg, ãgenei king,

donki naal teten ibod ken, isif.”‡

<sup>16</sup> Uruwa bagai, in dō fiya tar, enei ganan nigin wedereid fokōya san. Dum Negur Jesus fula fiya medeīya ifenē di, enei ã nigin ditoton ado, enei tamo kayau ã bun age difen anī, wedereid fokō yen.

<sup>17</sup> Tamo kayau Jesus geid difar fen, ã Lasarus matmat bun tamal iweigne ken, laa bun tamal turī fe di, lo difen idim wogagã def, dile di, od iyokelen. <sup>18</sup> Tamo kayau musei, Jesus memelik anī inon karī den nigin, ã fotou difiyēf nigin dilen. <sup>19</sup> Age dife di, Farisia tamo idi abob dirokenen, “Ulegef, ada kabī ege talegef. Lo gouf are, tamo kayau ganan ã dō difiyek!”

### *Jesus Yogon Laa Nigin Iron*

<sup>20</sup> Sifa bun Negur yana dalesauf nigin diselen idi atun, Grik tunī difaren. <sup>21</sup> Idi Filip Betsaida tamal Galili teneub bun, ã garan disi fen, to difiyē diron, “Tamo biya, amā Jesus mailau fenē.” <sup>22</sup> Age de di, Filip ile, Endru iroken ken, uruwom Jesus dirokenen.

<sup>23</sup> Jesus idi irokenēdin, “Negur Tamo Naal fula fiya medeīya ifenēf nigin, sain anī mogo yeir isil. <sup>24</sup> Aya ã momoi bagai arokeneik, wit faat taka teneub bun kubū ye fen, to burauf are, faat tekelei dogol agef ibodōf, anī ere, ã burauf are, faat musei wowā douf. <sup>25</sup> Tamo ã yogon mata

---

\* **12:13:** Anī nē gariya, ‘Usennamā!’ Od anī tamo kayau Negur yana yaleseya nigin wogō dedig. † **12:13:** Sam 118:25,

<sup>26</sup> ‡ **12:15:** Sekaraia 9:9



nigin wau laa fef are, ï mata anï itornēf, anï ere, tamo ï teneub enei bun, yogon mata atorok bagai ye fen, itorok are, ï ironnek ile, mata ibodkeleya bun ilauf. <sup>26</sup> Taka ï aya arunau yalef, ï aya dō fiyauf bagai. Aya abodok nē an, neu kabï tamo ïg an ibodōf. Taka ï arunau yalef, neu Dei ï yana yalesauf.

<sup>27</sup> “Gama neu wau morok, anï aya ere auf? ‘Dei sain enei bun usenna,’ auf de? Sã, gariya enei nigin bagai, sain enei bun asin. <sup>28</sup> Dei ogo yanã selï kulō!”

Age ye di, ait taka saa ilunem isin, “Aya mogo anï selu abin, aya baban anï selu abiyouf.” <sup>29</sup> Tamo kayau an difaren anï karï de fen, diron, kolimei den, tunï diron, engel takam wogō fiyem.

<sup>30</sup> Jesus iron, “Ait enei, ã isenneï di, momoi gouf nigin, aya nigin sã. <sup>31</sup> Gama Negur ï, teneub enei nē tamo kayau es fedif, gama teneub enei nē mudur iruwauf. <sup>32</sup> Anï ere, aya tenebur tamal dalesnauf sain, aya tamo ganan aya bun, didï afediyouf.” <sup>33</sup> Jesus yogo naig fe, laa fouf anï ifelnēdiyof nigin, od enei wogō yen.

<sup>34</sup> Tamo kayau aiten dale diron, “Lo bun amã Kristus gai gai ibodōf ya anï karï maun, naig fe di, õ urok, ‘Tamo Naal ï dalesnēf bagai?’ Ai anï Tamo Naal?”

<sup>35</sup> Age de di, Jesus idi irokenēdin, “Sain naal bagai ã lalan adouf. ã lalan ado mog, uyōg, anï bunem gugum to irousi kerū yeïf. Tamo ï gugum bun iyok, ï naib ilef are keleï sã. <sup>36</sup> ã lalan ado mog, ãgenei momoiya lalan bun unog, ago gouf, ã lalan gere tar wowã gouf.” Jesus od enei wogō yel fen, ï itorneïd ile, iminkelen.

### *Juda Tamo Kayau Jesus Nigin Fau To Momoi Den*

<sup>37</sup> Jesus idi meleid bun memelik musei inodin, anï ere, idi fau ï nigin to momoi den. <sup>38</sup> Enei are profet Asaia nē od kisi falauf nigin wō yen:

“Odug, aim nemã od nigin momoi yen?  
Aiyai bun Odug nē megeir yaor fen?”

<sup>39</sup> Gariya enei nigin, idi momoiya kisi feleya sã, ere nigin, Asaia baban od enei iron:

<sup>40</sup> “Negur idi meleid ifofa ken,  
    waud ifofakelen,  
anĩ bunem, idi meledim ileya kisi feleya sã,  
    waud fokōya kisi feleya sã,  
    waud faleiya kisi feleya sã, age fiya sam, aya el  
    afedim.”<sup>§</sup>

<sup>41</sup> Asaia od enei iron, ere nigin, ã Jesus nē fula fiya medeĩa ile fen, ã nigin iron.

<sup>42</sup> Mudur adodo idi atun, museig ã nigin momoi den. Anĩ ere, Farisia tamo idim Juda neid uub fō bun dirudidiya nigin kumĩ de fen, dogo neid momoiya to yaor difen. <sup>43</sup> Ere nigin, idi Negurem yeneid yaleseya ban, tamom yeneid dalesauf anĩ orodidig.

<sup>44</sup> Jesus iweig iron, “Tamo ã aya nigin momoi yef, ã aya nigin dogol to momoi yef, ã aya sur fiyan nigineg momoi yef. <sup>45</sup> ã aya lo fiyaf, im aya sur fiyan anĩ ilef. <sup>46</sup> Aya lalan anĩ, tenebur ein asin, are taka ã aya nigin momoi yef, ã gugum bun to ibodōf nigin age afen.

<sup>47</sup> “Taka ã neu od karĩ ye fen, to dō fef, aya ã to es afiyek, ere nigin, aya tamo kayau es fiya nigin to asin, aya kel gei fiya nigin asin. <sup>48</sup> Taka ã aya itorna fen, neu od to irouf, ã nigin es fiya tamo ibodok. Od de wogō aun anim, idikeleya naa bun ã es fiyēf. <sup>49</sup> Ere nigin, aya neu kisi nem to wogō aun, anĩ ere, Dei aya sur fiyan im, ere anĩ wogō auf, naig afe wogō auf anĩ, toli fiya di, wogō aun. <sup>50</sup> Aya keleĩ, yogon si fiya are mata faimud ibodkeleya bun ileya nē, anĩ nigin,

---

§ 12:40: Asaia 6:10

ereb aya wogõ auf, Dei aya wogõ auf nigin irokanan kilei bagai, aya wogõ auf.”

## 13

### *Jesus In Dõ Fiya Tar Yeid Kulo Fedin*

<sup>1</sup> Pasa nẽ Sifa fau wõya sã mog, Jesus kelein, ï teneub enei itor ken, Tama garan ileyã nẽ sain mogo wõ yel. Ï yogon tamo tar tenebur ein dibodok anidi nigin wau laa fedig, ï idi nigin wau laa fen are iroule idikeleya bun.

<sup>2</sup> Bõ saaf dõ mog, Satanem Judas Iskariot, Simon naal namen Jesus kiwai imeid bun ifenẽf nigin, kisi mogo ifenen. <sup>3</sup> Tama ï ereb ereb ganã, Jesus ima bun inon, ï Negur bunem isin anĩ, Negur bun kel ilef, are Jesus ï keleĩ. <sup>4</sup> Jesus saaf bun ibodon anĩ fã ye, yogon kolos teten inukeis fen, taul yale, luwa gu fen. <sup>5</sup> Age fel fen, ï naan yale, beĩ bun yu ken, yogon dõ fiya tar yeid kulo fiya gariya inon, agef fen, taul luwa gu fen anim yeid waĩ fedin.

<sup>6</sup> Jesus Simon Pita garan isi di, ï Jesus irokenen, “Oduq, õ aya yeu kulo wou fenẽ de?”

<sup>7</sup> Jesus Pita aiten yale irokenen, “Ereb aya age afef, õ gama keleĩ sã, anĩ ere, fau dum õ keleĩ youf.”

<sup>8</sup> Pita iron, “Aya yeu to bagai kulo wouf.”

Jesus Pita irokenen, “Aya õ to kulo ayõf are, õ aya ado nigal fiya sã.”

<sup>9</sup> Simon Pita Jesus irokenen, “Oduq, agouf are, yeu dogol sã, imau mudurou adog kulo wouf.”

<sup>10</sup> Jesus aiten yale iron, “Taka ï naan igukelel, ye dogol kulo fouf, bouwa ganã filiya. ã filiya ba, anĩ ere, ã ganã sã.” <sup>11</sup> Jesus ï aibem kiwai ifenẽf anĩ keleĩ, anĩ nigin, ganã filiya sã yen.

<sup>12</sup> Jesus yeid kulof bure fel fen, yogon kolos ifounkel, yogon modoũ bun kelen. Agef fen, ï idi to fedin, “Aya ereb

ã bun age afel anĩ, ã wedereĩ fokõ yef de? <sup>13</sup> ã aya ‘Tise’ ado ‘Odug’ gedig, are tutuk, ere nigin, aya de anĩ. <sup>14</sup> Aya ãgenei Tise ado Odug, ã yeĩ kulo afel, anĩ nigin, ãg abob ye kulo gouf. <sup>15</sup> Aya malakanon anokeneim, are ã nigin age afel gen, ãg ago gouf. <sup>16</sup> Aya ã momoi bagai arokeneik, ferfer takam yogon odug to wal fiyẽdig, arũ tamom ã sur fiyen to wal fiyẽdig. <sup>17</sup> Gama ã enei keleĩ, anĩ nigin, enei dõg ago gouf are, ã el yeĩf.

*Jesus Ĩ Kiwai Imeid Bun Inenẽf Nigin Iron*

*(Matyu 26:20-25; Mak 14:17-21; Luk 22:21-23)*

<sup>18</sup> “Aya ã ganan nigin to wogõ auf. Aya agirnẽdin idi, aya keleĩ, anĩ ere, enei are Negur nẽ Itotoya bun yenek anĩ kisi falauf nigin, “Taka ã aya urom neu bret moko, ã aya kiwai ifana fen, dã fiyal.”\*

<sup>19</sup> “Anĩ fau to wõ ye mog, gama aya ã arokeneik, anĩ bunem, anĩ wõ youf sain bun, aya de Im ya anĩ momoi gouf. <sup>20</sup> Aya ã momoi bagai arokeneik, taka ayam sur afe di, ã yalef are, ã aya yaleyaf, taka ã aya yaleyaf are, ã aya sur fiyan anĩ yalef.”

*Jesus Judasem Kiwai Ifenẽf Yen*

*(Matyu 26:20-25; Mak 14:17-21; Luk 22:21-23)*

<sup>21</sup> Jesus od enei wogõ yel fen, ã wau moro ken, kurõ feis iron, “Aya ã momoi bagai arokeneik, ãgenei takam aya kiwai ifanauf.”

<sup>22</sup> Yogon dõ fiya tar idi abob loli difen, ai nigin bagai wogõ yef de fen, nene den. <sup>23</sup> Idi neid taka, dõ fiya taka Jesus ã nigin wau laa fedig ã, Jesus sirin ibodon. <sup>24</sup> Simon Pita, dõ fiya tamo enei mudurem fiye ken, ã iron, “Ĩ ai nigin irok anĩ to wiyẽ.”

<sup>25</sup> Dõ fiya tamo anĩ, Jesus akoron mudur isen ken, to fen, “Odug, õ ai wof?”

---

\* **13:18:** Sam 41:9

<sup>26</sup> Jesus aiten yale iron, “Tamo bret enei beĩ bun nu afe fen, afenēf anĩ.” Age ye fen, ĩ bret nuf fen, Judas Iskariot, Simon naal ifenen <sup>27</sup> Judas bret anĩ yale di, Satan ĩ namen ilen.

Jesus Judas irokenen, “Ereb agou fenē, kaisã bagai ago.” <sup>28</sup> Anĩ ere, saaf bun dibodon anĩ takam, ere nigin Jesus od enei Judas irokenen anĩ, kisi to fokō yen. <sup>29</sup> Judas ĩ moni lo fiya tamo nigin, tunĩ kisi difen, Sifa nē erēb erēb na yalouf nigin be, maleg erēb erēb ifenēdiya nigin be, Jesusem Judas irokenē di, ilef den. <sup>30</sup> Judas ĩ bret yale fen, kaisã bagai oreis ilen. Sain anĩ bō.

*Pita Nē Wa Fiya Nigin Jesus Iron*

*(Matyu 26:31-35; Mak 14:27-31; Luk 22:31-34)*

<sup>31</sup> Judas iya ile di, Jesus iron, “Gama Tamo Naal fula fiya medeĩya yale di, Negur fula fiya medeĩya Tamo Naal bun yalef. <sup>32</sup> Negur fula fiya medeĩya Naal bun yalef are, Negur ĩ fula fiya medeĩya Yogo bun Naal ifenēf, fula fiya medeĩya anĩ kaisã bagai Naal ifenēf.

<sup>33</sup> “Neu kesu tar, aya ã geid sain naal bagai tabodōf. Ā aya umirnagauf. Aya Juda tamo arokenēdin kilei, gama ã arokeneik, aya elef nē an, ã isiya kisi feleya sã.

<sup>34</sup> “Aya ĩtãfiya mata afeneik, abob nigin wauĩ laa fouf. Aya ã nigin wau laa fedig kilei, ãg abob nigin wauĩ laa fouf bagai. <sup>35</sup> Ā abob nigin wauĩ laa fouf, anĩ bunem tamo ganan idi keleĩ youf, ã neu dō fiya tamo tar.”

<sup>36</sup> Simon Pita Jesus to fiyen, “Odug, õ nai ulef?”

Jesus iron, “Aya elef nē an, õ gama aya dō fiyaya kisi feleya sã, anĩ ere, õ fau dum dō wouf.”

<sup>37</sup> Pita to fen, “Odug, ere nigin gama aya õ dō yōya kisi feleya sã? Aya õ nigin neu mata atorōf.”

<sup>38</sup> Age ye di, Jesus iron, “Õ aya nigin ogon mata utorõf de? Aya õ momoi bagai arokonok, tataro fau kokorok yeya sã mog, õ aya nigin wa wo, towo wouf!

## 14

### *Jesus In Dõ Fiya Tar Neid Waud Wã Fen*

<sup>1</sup> “Ã wauĩ to morõ yeĩ. Negur nigin momoi gouf, aya nigineg momoi gouf. <sup>2</sup> Neu Dei nẽ fõ bun aab musei ado, age fiya sam are, arokeneim. Aya eselef nẽ an, ãgenei modoũ dodok afouf. <sup>3</sup> Aya esel, ãgenei modoũ dodok afel fen, aya ã geid tabodõf nigin, aya kelau gei ayeĩf, are ãg aya abodok nẽ an ubodõgouf nigin. <sup>4</sup> Aya eselef nẽ naab anĩ, ã keleĩ.”

### *Negur Bun Ileya Naab, Jesus*

<sup>5</sup> Tomas Jesus irokenen, “Odug, õ narib ulef are, amã keleĩ sã, anĩ nigin, naig mafe fen, amã naab anĩ keleĩ youf?”

<sup>6</sup> Jesus Tomas irokenen, “Aya dogol naab anĩ, aya dogol momoi anĩ, aya dogol mata anĩ. Taka ã naab taka bunem, Dei wagen to isiyouf, aya bunem dogol. <sup>7</sup> ã aya keleim are, ã neu Deig keleim. Gama sain enei bun ilauf, ã ã keleĩ, ã ulegel.”

<sup>8</sup> Filip iron, “Odug, Tamada ufelnamã, anĩ amã nigin deuf.”

<sup>9</sup> Jesus iron, “Filip, aya ã geid sain meluk tabodon, anĩ ere, õ aya keleĩ sã de? Taka ã aya ileyen are Dei ilen. Naig fe di, õ urok, “Tamada ufelnamã”? <sup>10</sup> Aya Dei bun abodok, Dei aya bun ibodok anĩ to momoi wof de? Od aya wogõ ayeik are, aya yug bun tamal sã, are Dei aya bun ibodok ã kabĩ yalef. <sup>11</sup> Aya Dei bun abodok, Dei ã aya bun ibodok anĩ, momoi wiyagauf, sãf are, aya kabĩ aledig bun, momoi wiyagauf. <sup>12</sup> Aya ã momoi bagai arokeneik, taka ã aya nigin

momoi yef, ereb aya age afedig, ãg age foug, enei age afedig anĩ wal fiyag age foug, ere nigin, aya Dei gein eselef. <sup>13</sup> Å ereb taka nigin, aya yanau nem to gouf, aya age afoug, anĩ bunem, Dei ĩ Naal bun, fula fiya medeĭya yalouf. <sup>14</sup> Ereb taka nigin, aya yanau nem to wiyagouf are, aya age afoug.

*Jesus Awa Uur Fateul Sur Afoug Yen*

<sup>15</sup> “Å aya nigin wauĩ laa foug are, neu ĩtãfiya anĩ dõ gouf. <sup>16</sup> Aya Dei arokenẽ di, ĩ Isenneĭya taka, ã geid gai gai ibodõf nigin ifeneĩf, <sup>17</sup> are momoi nẽ Awa Uur. Tenebur ein tamo kayau ĩ to dalouf, ere nigin, idi ĩ to dilef, to keleĩ. Anĩ ere, ã ĩ keleĩ, ere nigin, ĩ ã geid ibodok, ã bun ibodõf. <sup>18</sup> Aya ã madmad gen to atorneĩf. Aya ã gein asiyouf. <sup>19</sup> Sain naal bagai ile di, tenebur ein tamo kayau, aya to dileyau, anĩ ere, ã uleyagouf. Aya mata abodok nigin, ãg mata ubodõgouf. <sup>20</sup> Naa anĩ bun, aya neu Dei bun abodok, ã aya bun ubodõgef, aya ã bun abodok anĩ, ã keleĩ youf. <sup>21</sup> Taka ĩ neu ĩtãfiya irou dõ fef, ĩ aya nigin wau laa fedig. ĩ aya nigin wau laa fedig anĩ, neu Dei ĩ nigin wau laa foug, ayag ĩ nigin wau laaf fen, aya yug ĩ bun yaor afoug.”

<sup>22</sup> Age ye di, Judas taka (Judas Iskariot anĩ sã) iron, “Odug, ere nigin õ ogo, amã bun dogol õ yaorõf, tenebur ein tamo kayau bun sã?”

<sup>23</sup> Jesus iron, “Taka ĩ aya nigin wau laa fef, ĩ neu od dõ foug. Neu Dei ĩ nigin wau laa foug, anĩ amã ĩ gein masi, weim mabodõf. <sup>24</sup> Taka ĩ aya nigin to wau laa fef, ĩ neu od to dõ foug. Od enei ã karĩ gef, are aya bun tamal sã, are Dei aya sur fiyan nẽ od.

<sup>25</sup> “Aya fau ã geid tabod ken, od enei ganan wogõ ayein. <sup>26</sup> Anĩ ere, Isenneĭya, Awa Uur Fateul anĩ, Deim aya yanau nem sur foug, Awa Uur Fateul ĩ, ereb ereb ganan ifelnei ken, aya arokenein anĩ ganan wedereĩ fokõf fen, kisi turĩ foug. <sup>27</sup> Wau inosiya atorkeneik, neu wau inosiya afeneik,

aya afeneik are, tenebur ein tamo kayau wau inosiya difeneik gen sã. ã wauĩ to morõ yei ken, kumĩg.

<sup>28</sup> “Aya eig au di, karĩ gel, ‘Aya ele fen, ã gein kelau asiyouf.’ ã aya nigin wauĩ laa fem are, aya Dei bun elef anĩ nigin, ã kuliya adom, ere nigin, Dei ĩ aya wal fiyaya. <sup>29</sup> Anĩ wõya sã mog, aya mogo arokeneim, anĩ bunem, agef wõ ye di, ã momoi gouf. <sup>30</sup> Aya ã geid, sain meluk to wogõ tauf, ere nigin, teneub enei nẽ mudur mogo isif. Anĩ ere, ĩ aya lai fiyaya nigin megeir sã, <sup>31</sup> anĩ ere, tenebur ein tamo kayau keleĩ bagai youf, are aya Dei nigin wau laa fef, anĩ nigin, neu Dei irokanan kilei bagai age afedig.

“Fafãg fen, modou enei tatorõg.

## 15

### *Aa Wain Gariya Ado Yogon Were*

<sup>1</sup> “Aya aa wain bagai, neu Dei ĩ kabĩ marau. <sup>2</sup> Were aya bun biya to yuk anĩ ganan, Deim kokour falauf, were biya yuk anĩ ganan, Deim dẽ fe di, biya musei imauf. <sup>3</sup> Aya od wogõ ayein anim, ã amuyẽ sã, ã mogo filiya. <sup>4</sup> ã aya bun ubodõgouf, ayag ã bun abodõf. Were taka aa wain luwa ado to susu falauf are, yogo biya yũya kisi feleya sã. Age fiya bagai, ãg aya bun to ubodõgouf are, biya yũya kisi feleya sã.

<sup>5</sup> “Aya aa wain gariya, ã were. Taka ĩ aya bun ibodõ di, ayag ĩ bun abodõf are, ĩ biya musei imauf. Aya utornagauf are, ã ereb taka to ago gouf. <sup>6</sup> Taka ĩ aya bun to ibodõf are, ĩ were dirail di, meti ledig gen. Were age fediya are gei de fen, yã dirarã di, isasaikediyouf. <sup>7</sup> ã aya bun ubodõge di, neu od ã bun ibodõf are, ereb taka oroyei ken, urokanage di, ifeneif. <sup>8</sup> Biya musei ũg fen, neu dõ fiya tar wowã gouf are, neu Dei ĩ fula fiya medeĩya yalouf.



<sup>9</sup> “Neu Dei aya nigin wau laa fedig kilei, ayag ã nigin wau laa fedig. Gama ã neu wau laa fiya anĩ bun ubodög. <sup>10</sup> Aya neu Dei nẽ itãfiya dõ afe fen, yogon wau laa fiya bun abodok kilei, ã neu itãfiya dõ gouf are, neu wau laa fiya bun ubodögouf. <sup>11</sup> Aya enei arokeneim, are neu kulīya ã namein ibod ken, ãgenei kulīya barikãf nigin. <sup>12</sup> Neu itãfiya are yeir, aya ã nigin wau laa fedig gen, ãg abob nigin wauĩ laa fouf. <sup>13</sup> Wau laa fiya enei wau laa fiya ganan wal fiya, are yogon mou tar nigin yogon mata itorok anĩ. <sup>14</sup> ã aya ereb itãfiya arokenein anĩ dög, ago gouf are, ã neu mou tar. <sup>15</sup> Aya baban ã to ferfer ayeif, ere nigin, ferfer i yogon tamo odug nẽ kabĩ keleĩ sã. Anĩ ere, aya ã neu mou tar ayeim, ere nigin, ereb ereb ganan aya Dei bun karĩ aun anĩ, aya ã afelneim. <sup>16</sup> Ägem aya to ugirnagen, aya ã agirnei ken, uleg, biya üg fen, biya anĩ ibodkalauf nigin ã ayein. Agog fen, aya yanau nem, ereb taka nigin Dei urokenẽge di, ifeneif. <sup>17</sup> Enei anĩ neu itãfiya, abob nigin wauĩ laa fouf.

*Tenebur Tamo Kayau, Dõ Fiya Tamo Tar Nigin Kiwai Difenẽdiyouf*

<sup>18</sup> “Tenebur tamo kiwai difeneif are, aya ketem kiwai difanan anĩ, ã keleĩ youf. <sup>19</sup> ã teneub enei nẽf are, ã yogon nigin, ã nigin wau laa fouf. Anĩ ere, ã teneub enei nẽ sã, aya ã tenebur tamal gei ayei ken, agirnein. Anĩ nigin, tenebur ein ã kiwai difeneik. <sup>20</sup> Aya od arokenein anĩ, ã karĩ walagauf, ‘Ferfer taka yogon odug to wal fedig.’\* Idi aya darau difanan are, ãg age de darau difeneif. Idi neu od dõ difen are, idi ãgeneig age de dõ difouf. <sup>21</sup> Idi enei ganan ã bun age difouf, ere nigin, aya yanau ã ado, are aya sur fiyan idi i keleĩ sã nigin. <sup>22</sup> Aya to asi fen, arokenẽdim are, idi mosor sam. Anĩ ere, idi neid mosor nigin to galã dũf. <sup>23</sup> Taka i aya kiwai ifanaf, i neu Deig kiwai ifenek.

---

\* 15:20: Jon 13:16

<sup>24</sup> Taka nem to age fen anī, aya idi atun to age afem are, idi mosor sam. Anī ere, gama idi memelik dile fen, aya neu Dei ado kiwai difanaman. <sup>25</sup> Anī ere, enei, idi neid Lo bun ditoton yenek anī, kisi falauf nigin, ‘Idi aya mura sā kiwai difanan.’†

<sup>26</sup> “Awa Uur Isenneīya are, ayam Dei bun tamal ā bun sur afe di, isiyouf, are momoi nē Awa Uur, Dei bun tamal ulō yeis isi fen, ī aya nigin kurō fesiyouf. <sup>27</sup> Āg agog kurō wesigouf bagai, ere nigin, ā aya geid fen, gariya bunem tasin.

## 16

<sup>1</sup> “Ā to felu rogouf nigin, od enei ganan mogo ā wogō ayeim. <sup>2</sup> Idi ā Juda neid uub fō bun diruyeīf. Takag, sain fau isiyouf bun, taka ī ā ideneīkeis fen, kisi fouf, Negur sesewi afiyek youf. <sup>3</sup> Idi enei age difouf, ere nigin, idi Dei keleī sā, aya nigineg keleī sā. <sup>4</sup> Aya enei mogo arokeneim, are sain isiyouf bun, ā wedereī aroul anī, karī walagauf nigin. Aya enei tetun to arokenein, ere nigin, aya ā geiden.

### *Awa Uur Fateul Nē Kabī*

<sup>5</sup> “Gama aya ī sur fiyan gein eselef, anī ere, ā takam to aya to fiyaf, ‘Ō nai ulef?’ <sup>6</sup> Aya enei arokeneim nigin, ā fatuk bagai wauī gudū fef. <sup>7</sup> Anī ere, aya momoi arokeneik, aya āgenei biya fiya nigin eselef. Aya to eselauf are, Isenneīya anī ā bun to isiyouf, aya eselauf are, aya ī, ā bun sur afouf. <sup>8</sup> Sain ī isiyouf, tenebur ein tamo kayau bun, mosor nigin, Negur nē madur fiya nigin ado, Negur nē es fiya nigin, idi neid kū fenēya anī yaor fe, faded fediyouf. <sup>9</sup> Mosor are, idi aya nigin to momoi def nigin. <sup>10</sup> Negur nē madur fiya are, aya Dei gein esele di, ā aya to uleyagauf nigin. <sup>11</sup> Negur nē es fiya are, teneub enei nē mudur mogo es fiyen nigin.

---

† 15:25: Sam 35:19; 69:4

<sup>12</sup> “Aya ã irokeneĩya nigin musei biya, anĩ ere, ã gama keleĩya kisi feleya sã. <sup>13</sup> Anĩ ere, sain momoi nẽ Awa Uur isiyouf bun, momoi nẽ anĩ ganan bun, im itoneĩf. Ĩ yogon kisim to wogõ youf, ereb ĩ karĩ yef anĩ wogõ youf, agef fen, ereb fau wõ youf anĩ irokeneĩf. <sup>14</sup> Ĩ neu bun tamal yale fen, ã ifelneĩf, anĩ bunem, aya fula fiya medeĩya ifanauf. <sup>15</sup> Dei nẽ ganan are neu, anĩ nigin, aya arom, Awa Uur neu bun tamal yale fen, ã ifelneĩf aul.

<sup>16</sup> “Sain naal bagai ile di, ã to uleyagauf, agef fen, baban sain naal bagai ile di, aya uleyagauf.”

*In Dõ Fiya Tar Waud Gudũ Fef Are Fau Kulĩ Douf*

<sup>17</sup> In dõ fiya tar tunĩ abob dirokenen, “Ere gariya nigin eig ye irok, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?” <sup>18</sup> Idi anĩ fau fau wogõ den, “Ĩ ere ye fen, ‘sain naal bagai’ yen? Ĩ irok anĩ, amã gariya keleĩ sã.”

<sup>19</sup> Idi enei nigin Jesus to difou fenẽ mog, Jesus anĩ ile fen, idi irokenẽdin, “Aya eig aul anĩ nẽ gariya nigin abob to wiyẽgef de, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf’?” <sup>20</sup> Aya ã momoi bagai arokeneik, ã fau maruĩ isi fen, wauĩ gudũ fouf, tenebur tamo kayau kulĩ de mog. ã wauĩ gudũ fouf, anĩ ere, ãgenei wauĩ gudũ fiya falei yel kulĩ youf. <sup>21</sup> Kayau kesu ibodõ fenẽ darau fef, ere nigin, yogon naa wõ yel, anĩ ere, yogon kesu wõ ye di, darau weder tu kelef, ere nigin, kesu tenebur wõ yel nigin kulĩ yef. <sup>22</sup> Ąg age fiya, gama ãgenei wauĩ gudũ fiya nẽ naa, anĩ ere, aya baban ailiyeĩ di, ã kulĩ gouf, taka nem ãgenei kulĩya to yalelkeneĩf. <sup>23</sup> Naa anĩ bun, ereb taka nigin ã to, to wiyagauf. Aya ã momoi bagai arokeneik, aya yanau bunem, ereb taka nigin neu Dei to wiyẽgouf are, ifeneĩf. <sup>24</sup> Uruwa bunem isi gama, aya

yanau nem, ereb taka nigin to, to gen. To gouf, walogouf, ago gouf, ã kuliya barikáf.

<sup>25</sup> “Aya yaab od wogō audig, anī naa taka isiyouf bun, aya yaab od to wogō auf, anī ere, neu Dei nigin yaor arokeneif.

<sup>26</sup> Naa anī bun, aya yanau bunem to gouf. Aya ã nigin Dei to afiyēf ya anī to arokeneik, <sup>27</sup> ere nigin, ã aya nigin wauī laaf fen, aya Negur bun tamal asin anī, momoi gedig nigin, Dei ã nigin wau laa fedig. <sup>28</sup> Aya Dei bun tamal ulō aus fen, tenebur asin, gama aya teneub enei ator ken, Dei bun kelauf.”

<sup>29</sup> Age ye di, Jesus nē dō fiya tar diron, “Gama ò yaor wogō wof, yaab od nem sã. <sup>30</sup> Gama amã mailef, ò ereb ereb ganan keleī, are taka nem to yōf anīg to tari wodig. Anī bunem, ò Negur bun tamal usin anī, momoi mauf.”

<sup>31</sup> Jesus aitedin yale iron, “Ã gama momoi gef de? <sup>32</sup> Anī ere, naa fau isif, are mogo isil, anī bun, ã firagagaū yeī, āgenei fonō fonō yeīf. ã aya mugu utornagauf. Anī ere, aya mugu sã, ere nigin, neu Dei ĩ aya ado.

<sup>33</sup> “Ã aya bun wauī inosiya adouf nigin, od enei arokeneim. Tenebur ein ã morō adouf, anī ere, total ado ufaragauf! Aya teneub enei nē megeir mogo wal afen.”

## 17

### *Jesus Yogo Nigin Kosē Yen*

<sup>1</sup> Jesus od enei wogō yel fen, saa ilun itad fen, kosē yen:

“Dei, naa mogo isil, fula fiya medeīya ò Naal wenē, ago di, ò Naal ò selī kulō fouf. <sup>2</sup> Are ò Naal, idi ganan ò wenen bun, mata faimud ibodkeleya ifenēdiyof nigin, tamo kayau ganan lo fediya nē megeir ò wenen. <sup>3</sup> Mata faimud ibodkeleya are yeir, ò momoi Negur tekelei ado Jesus Kristus ò sur won anī, idi keleī youf anī. <sup>4</sup> Kabī ò wanan anī adikelen bunem, tenebur ein aya ò bun fula fiya medeīya arou asin. <sup>5</sup> Dei, teneub kare fiya sã mog,

ada urom fula fiya medeïya adon anï, ò malã bun fula fiya medeïya anï gama wana.

*Jesus In Dõ Fiya Tar Nigin Kosẽ Yen*

<sup>6</sup>“Aya teneub enei bun tamal ò wanan idi bun, ò yaor ayon. Idi ogon, anï ere, ò idi wanan, ago di, idi ogon od dõ difedig. <sup>7</sup>Gama idi keleï, ereb ereb ganan aya wanan are ò bun tamal. <sup>8</sup>Aya od wanan anï afenẽdi di, idi dalen. Aya ò bun tamal asin anï, idi momoi bagai kelein, idi onom aya sur wiyan anï momoi den. <sup>9</sup>Aya idi nigin kosẽ auf. Aya teneub enei nẽ tamo kayau nigin to kosẽ auf, anï ere, idi ò wanan anidi nigin kosẽ auf, ere nigin, idi ogon. <sup>10</sup>Neu ganan are ogon, ogon are neu. Idi bunem, aya fula fiya medeïya alel. <sup>11</sup>Aya tenebur ein to abodõf, anï ere, idi fau tenebur dibodok, aya ò gein esef. Dei Fateul, ò yanã wanan nẽ megeir bunem, kulatun wediyouf, anï bunem, ada tekelei gen idig tekelei youf. <sup>12</sup>Sain aya idi geid mabodon, ò aya yanã wanan anï bunem, kulatun afeid el afen. Taka to fõ yelen, tamo ï fõ yalauf nẽ dogol fõ yelen, are Negur nẽ Itotoya kisi falauf nigin.

<sup>13</sup>“Gama aya ò gein esef, neu kulïya idi namedin barikãf nigin, tenebur ein fau abod ken, od enei arok. <sup>14</sup>Aya ogon od afenẽdi di, teneub enei nẽ tamo kayau idi kiwai difenẽdin, ere nigin, gama aya teneub enei nẽ sã, age fiya gen, idig teneub enei nẽ sã. <sup>15</sup>Aya teneub enei bun tamal walelnẽdiyof nigin to kosẽ auf, anï ere, wadãgen tamo sane isi fen, daũ fediya nigin, kulatun wediyouf anï kosẽ auf. <sup>16</sup>Aya teneub enei nẽ sã, age fiya gen, idig teneub enei nẽ sã. <sup>17</sup>Momoi bunem fateul unenẽdiyof, ogon od are momoi. <sup>18</sup>Õ tenebur ein sur wiyan gen, ayag teneub enei bun sur afiyẽdin. <sup>19</sup>Idi

nigin, aya yug adok bagai afonok, are idig momoi bagai dogo adok Negur difenēf nigin.

*Jesus Momoiya Tamo Kayau Ganan Nigin Kosē Yen*

<sup>20</sup> “Aya neu kosēya are idi nigin dogol sã, idi neid od bunem, aya nigin momoi douf anidi nigineg, aya kosē auf, <sup>21</sup> idi ganan tekelei youf nigin kosē auf, Dei ò aya bun ubodok, aya ò bun abodok gen, idig ada bun dibodò di, teneub enei nē tamo kayau, onom aya sur wiyan anī, momoi douf nigin. <sup>22</sup> Fula fiya medeīya ò wanan anī, idi afenēdin, are ada tekelei gen, idig tekelei youf nigin. <sup>23</sup> Aya idi bun, ò aya bun, are idi tekelei youf nigin, anī bunem, onom aya sur wiya fen, aya nigin waū laa fedig gen, idi nigineg waū laa fedig anī, teneub enei nē tamo kayau keleī youf.

<sup>24</sup> “Dei, idi ò aya wanan anidi, aya abodok nē an, aya geid mabodōf anī orouf, are idi neu fula fiya medeīya dilouf nigin, fula fiya medeīya anī teneub kare fiya sã mog, ò aya nigin waū laaf fen, wanan anī.

<sup>25</sup> “Dei madur bagai, teneub enei nē tamo kayau idi ò keleī sã, anī ere, aya ò keleī, neu dō fiya tar idi, onom aya sur wiyan anī keleī. <sup>26</sup> Aya ò anī afelnēdi di, idi ò keleī, ò nigin fau fau afelnēdif alauf, are ò aya nigin waū laa fiya anī, idi bun ibodōf ado, ayag idi bun abodōf nigin.”

## 18

*Jesus Dirounen*

*(Matyu 26:47-56; Mak 14:43-50; Luk 22:47-53)*

<sup>1</sup> Jesus od enei wogō yel fen, ī yogon dō fiya tar geid, Kidron naan uus atu dilen. Kidron sitakã kabī taka ibodon, ī yogon dō fiya tar geid, kabī atu dilen.

<sup>2</sup> Kiwai tamo Judas ī modoū anī keleī, ere nigin, sain musei Jesus in dō fiya tar geid an guru difedig. <sup>3</sup> Anī nigin,

Judas, kusĩ tamo tunĩ ado, tempel lo fiya tamo tunĩ pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusĩ nē waila guri de fen, dilen.

<sup>4</sup> Jesus, ĩ bun wō youf anĩ ganan kelein, ĩ iyok ile to fedin, “Ā ai umirnēgef?”

<sup>5</sup> Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren. <sup>6</sup> Sain Jesus iron, “Aya im,” ye di, idi soso de dile, tenebur kuku den.

<sup>7</sup> Jesus baban idi to fedin, “Ā ai umirnēgef?”

Idi diron, “Jesus Nasaret tamal.”

<sup>8</sup> Jesus iron, “Aya ā arokeneim, aya im. Aya anĩ umir-nagauf are, tamo eneidi utornēdig len, dile.” <sup>9</sup> Agef iron are, od Jesus wogō yen anĩ kisi falauf nigin, “Aya ō wanan anidi taka to folō afelen.”\*

<sup>10</sup> Age dife di, Simon Pita ĩ, dimig adon anĩ ul feis yale, pris neid mudur nē ferfer weder biya melem salōf iran. Ferfer anĩ yana Malkus.

<sup>11</sup> Age fe di, Jesus Pita irokenen, “Ogon dimig yogon modoũ bun kel uno! Dei aya naan kap ifanan anĩ, aya to āf de?”

### *Jesus Anas Garan Dirou Dilen*

<sup>12</sup> Age ye di, kusĩ tamo, nedi mudur, Juda neid tempel lo fiya tamo geid, Jesus dalen. Idi ĩ difo ken, <sup>13</sup> Anas garan ket dirou dilen, Anas ĩ, Kaiafas ne ten, yar anĩ bun Kaiafas ĩ pris neid mudur ibodon. <sup>14</sup> Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

### *Pita Jesus Nigin Wa Fen*

*(Matyu 26:69, 70; Mak 14:66-68; Luk 22:55-57)*

---

\* **18:9:** Jon 6:39

<sup>15</sup> Simon Pita, Jesus nē dō fiya tar taka ado, Jesus dō difen. Pris neid mudur, dō fiya tar taka anī keleī, anī nigin, ī Jesus ado, pris neid mudur nē fofomalan kau namen dilen. <sup>16</sup> Anī ere, Pita ī serē bobogen ifaren. In dō fiya taka ī pris neid mudur ī nigin keleī, ī baban serē ke len, bobog lo fiya kayau iroken ken, Pita yale irou, namen dilen.

<sup>17</sup> Kabī kayau bobog lo fedig ī, Pita to fiyen, “Ōg be, in dō fiya tamo taka anī sã de?”

Pita iron, “Aya sã.”

<sup>18</sup> Menig nigin, ferfer, tempel lo fiya tamo geid, yã kũ de fen, salili de, bouweid diroron. Pita īg weim difar fen, bouwa iroron.

*Pris Neid Mudur Jesus To Fiyen*

*(Matyu 26:59-66; Mak 14:55-64; Luk 22:66-71)*

<sup>19</sup> Fō namen, pris neid mudur, Jesus ī, in dō fiya tar nigin ado, yogon od tai fedin nigin to fiyen.

<sup>20</sup> Jesus solof iron, “Aya tamo kayau atun, mala yaor wogō aun. Aya sain faimud Juda neid uub fō bun be, tempel bun, Juda tamo kayau ganan guru de mog, wogō audig. Aya iminēyan taka to wogō aun. <sup>21</sup> Ere nigin anī aya to wiyaf? Idi aya wogō au di, karī difiyan onou idi to wiyeid. Ereb aya wogō aun, idi keleī.”

<sup>22</sup> Jesus age ye irō di, tempel lo fiya tamo taka non ifaren anim, Jesus wala fãf fen, iron, “Pris neid mudur anī, ō ago urokenēdig de?”

<sup>23</sup> Jesus solof irokenen, “Aya ereb kũ fenēya arom are, ō ereb kũ fenēya anī urōf. Anī ere, aya momoi arom are, ere nigin ō walau fã wol?” <sup>24</sup> Age ye di, Anas Jesus difon ado, pris neid mudur Kaiafas gein sur fen.

*Pita Jesus Nigin Baban Wa Fen*

*(Matyu 26:71-75; Mak 14:69-72; Luk 22:58-62)*



<sup>25</sup> Simon Pita bouwa irorouk ifar mog, idi ï to difiyen, “Õg be, in dõ fiya tamo taka anï sã de?”

Ï waf fen, iron, “Aya sã.”

<sup>26</sup> Pris mudur nẽ ferfer taka, ï Pitam weder salõf iran nẽ sirag anim iron, “Aya õ ï urom kabier to ailiyeim de?”

<sup>27</sup> Pita baban waf mog, kaisã bagai tataro kokorok yen.

### *Jesus Pailat Mala Bun Ifaren*

*(Matyu 27:1, 2, 11-31; Mak 15:1-20; Luk 23:1-25)*

<sup>28</sup> Age fe di, Juda tamo, Jesus Kaiafas bun tamal dale dirou, Rom gawaman mudur nẽ fõ bun dilen. Are bonimeï bagai, Juda tamo idi Pasa nẽ saaf dãf nigin, kal sese de fen, gawaman mudur nẽ fõ namen to dilen. <sup>29</sup> Anï nigin, Pailat idi gedin ulõ yeis isi fen, to fedin, “Ere od ã tamo enei bou bun unogouf?”

<sup>30</sup> Idi solo de diron, “Ï lo wal fiya tamo sam are, amã õ gein to marou masim.”

<sup>31</sup> Pailat idi irokenẽdin, “Ã aug ï waleg fen, ãgeneï lo bun es wiyẽg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.” <sup>32</sup> Are Jesus ï naig be fe, laa fouf nigin wogõ yen anï, kisi falauf nigin agef wõ yen.

<sup>33</sup> Age de di, Pailat aaben kel ile, Jesus iweigne ken, to fiyen, “Õ Juda neid king de?”

<sup>34</sup> Jesus solof iron, “Õ ogon kisim od enei urok de, tunim be aya nigin õ diroknon?”

<sup>35</sup> Pailat solof iron, “Aya Juda tamo de? Õ ogon tamo kayaum pris odudug geid, aya bun dirousiyom. Õ ere taka tau agon?”

<sup>36</sup> Jesus iron, “Aya neu tano teneub enei nẽ sã. Aya neu tano teneub enei nem are, neu kabï tamo, Juda tamom aya to daleyauf nigin kusï dem. Anï ere, neu tano teneub enei nẽ sã.”

<sup>37</sup> Age ye di, Pailat Jesus irokenen, “Age fouf, ò king de?”

Jesus solof iron, “Õ ogo yer urok, aya king. Enei nigin aya wõ aun, are momoi anĩ wogõ auf nigin, anĩ nigin, aya tenebur asin. Momoi nē ganan, aya karĩ difiyadig.”

<sup>38</sup> Pailat to fen, “Ere anĩ momoi?” Age yel fen, ã baban Juda tamo gedin serē ile, idi irokenēdin, “Aya ã bun mosor taka to ailef. <sup>39</sup> Anĩ ere, āgenei tobonuneĩ eig fiya, Pasa naa bun, kalabus tamo taka aliskeneĩdig. Ā Juda neid king aliskeneĩf anĩ oroyeik de?”

<sup>40</sup> Idi baban diweig, solo de diron, “Sã, ã sã! Barabas anĩ wanamãf!” Barabas ã anĩ bē tamal.

## 19

### *Pailat Jesus Aa Tetek Bun Dũf Nigin Iron*

<sup>1</sup> Age de di, Pailat Jesus yale fen, irõ di, wagĩ difiyen.

<sup>2</sup> Kusĩ tamo malũ duri ado dale, teter tanak kori de fen, ã mudur bun kurũ difiyen. Idi gabar kadaũ dale difounne ken, <sup>3</sup> idi baba baban ã wagen dile fen, diron, “O Juda neid king gai gai ibodõf!” Age de fen, wala fã difen.

<sup>4</sup> Pailat baban serē kel isi fen, Juda tamo irokenēdin, “Ulegef, aya ã bun mosor taka to ailef anĩ, ã keleĩ youf nigin, ã ã gein arou asif.” <sup>5</sup> Sain Jesus malũ duri kurũ difiyen, gabar kadaũ difounnen ado, serē isi di, Pailat idi irokenēdin, “Tamo are yeir!”

<sup>6</sup> Pris odudug, tempel lo fiya tamo geid, ã dile fen, diweig diron, “Aa tetek bun ũf! Aa tetek bun ũf!”

Anĩ ere, Pailat idi irokenēdin, “Ā aug waleg, aa tetek bun ũg. Aya ã bun mosor taka to ailef.”

<sup>7</sup> Juda tamo idi solo de diron, “Amã nemã lo ado, lo anĩ kilei ã laa fouf, ere nigin, ã yogo aya Negur Naal yedig.”

<sup>8</sup> Od enei Pailat karĩ ye fen, fatuk bagai kumĩ yen. <sup>9</sup> ã baban fõ aaben kel ile fen, Jesus to fiyen, “Õ nain tamal?” Anĩ ere, Jesus aiten to yalen. <sup>10</sup> Pailat Jesus irokenen,

“Õ aya od to urokanauf de? Aya ò kafī fiya bun tamal yalelnōya nigin megeir ado, ò aa tetek bun inōya nigineg megeir ado anī, ò keleī sā de?”

<sup>11</sup> Jesus solof iron, “Ilun tamal megeir ò to ifonom are, aya ogon megeir farumen to abodom. Anī nigin, tamo taka ī aya ò imā bun inenan, ī yogon mosor odug bagai, ogon wal fiya.”

<sup>12</sup> Jesus Pailat age fiyē di, Pailat Jesus kafī fiya bun tamal yalishnēf nigin, naab imiren, anī ere, Juda tamo idi diweig diron, “Õ tamo enei utornē di, ilauf are, ò Sisa\* nē mou sā. Taka ī yogo anī king yef, ī Sisa kiwai ifenek.”

<sup>13</sup> Pailat od enei karī ye fen, Jesus serē yale irou isi fen, es fiya tamo nē sia, Meein Bedu dedig modoū bun ibodon (Meein Bedu are, Hibru od nem yana Gabata). <sup>14</sup> Naa are Pasa Sifa nigin dodok fiya naa, gaa atun age fiya, naa anī ilele di, Pasa naa wō youf.

Pailat Juda tamo idi irokenēdin, “Āgenei king yeir.”

<sup>15</sup> Anī ere, idi diweig diron, “Uru uraile! Uru uraile! Aa tetek bun ū!”

Pailat to fen, “Aya āgenei king aa tetek bun aūf de?”

Pris odudug solo de diron, “Amā king taka sā, Sisa dogol.”

<sup>16</sup> Anī nigin, Pailat Jesus aa tetek bun dūf nigin, idi imeid bun inon.

### *Jesus Aa Tetek Bun Dun*

*(Matyua 27:32-44; Mak 15:21-32; Luk 23:26-43)*

Anī nigin, kusī tamo Jesus dalen. <sup>17</sup> Ī yogon aa tetek faali fe, modoū Mudur Tuwan (Hibru od nem Golgota dedig) iselen. <sup>18</sup> An idi Jesus aa tetek bun dun, tamo uru idig, ī geid aa tetek bun didenen, idi urom si sitakā, Jesus atun.

---

\* **19:12:** Rom neid king odug.

<sup>19</sup> Pailat irõ di, eig de ditot fen, aa tetek bun degẽ difen: JESUS NASARET TAMAL, JUDA NEID KING. <sup>20</sup> Juda tamo kayau musei itotoya enei diwesen, ere nigin, Jesus aa tetek bun dun modoũ are taun non. Itotoya are Hibu od nem, Rom od nem, Grik od nem. <sup>21</sup> Juda neid pris odudug Pailat dirokenen, “To ‘Juda neid King’ wo utot, anĩ ere, tamo enei yogo aya Juda neid king yen, ago utot.”

<sup>22</sup> Pailat aitedin yale iron, “Ereb aya atoton, are de agef ibodõf.”

<sup>23</sup> Sain kusĩ tamo Jesus aa tetek bun du ken, Jesus nẽ kolos gei difeid, aiwa adodo foi difen, are teke tekelei kusĩ tamo mugu mugum gei difen, kolos meluk ilon tamal dogol foi fiya sã. Kolos are meluk tekelei tokõ feleya diwan.

<sup>24</sup> Idi abob dirokenen, “Ada anĩ to serek tafouf, ada aisaĩ tara ken, aibem yalouf anĩ tailauf.”

Negur nẽ Itotoya eig ye irok anĩ kisi falauf nigin, agef wõ yen,

“Neu kolos idi atun foi difeid fen,  
neu kolos meluk nigin aisaĩ diran.”†

Anĩ nigin, kusĩ tamo idi enei age difen.

<sup>25</sup> Jesus nẽ aa tetek sirin, Jesus sina, sina nẽ tura, Maria Kolopas aiwa, Maria Magdala tamal an difaren. <sup>26</sup> Sain Jesus mala irã, sina ado in dõ fiya tamo taka ĩ nigin wau laa fedig non difar mog, ileid fen, Jesus ĩ sina irokenen, “Kayau, õ naal yeir.” <sup>27</sup> Age ye fen, Jesus yogon dõ fiya tamo irokenen, “Enei ogon sinã.” Naa anĩ bunem ilen, dõ fiya tamo enei sinawau yale, yogon fõ bun iroule, kulatun fiyen.

*Jesus Laa Fen*

(Matyu 27:45-56; Mak 15:33-41; Luk 23:44-49)

---

† 19:24: Sam 22:18

<sup>28</sup> Anĩ dumen, Jesus keleĩ, ereb ereb ganan mogo gama bure felel, Negur nẽ Itotoya bun ibodok anĩ kisi falauf nigin, Jesus iron, “Aya naan ail fiyaf.” <sup>29</sup> Wain makik yag ado an ibodon, idi spons dale, wain bun nu dife, aa hisop were bun dino fen, dales, Jesus sigoron dinon. <sup>30</sup> Jesus wain makik anĩ yale fen, iron, “Gama bure.” Age yel fen, guyu kureis, yogon uur itoron.

<sup>31</sup> Gama naa are dodok fiya nẽ, we fele di, are Sabat naa, Sabat anĩ are, uub odug. Juda tamo idi, Sabat naa bun, bouweid aa tetek bun ifareya ditorõdig, anĩ nigin, idi yeid weweur difeid, bouweid gei difalaisiyouf nigin, Pailat dirokenen. <sup>32</sup> Anĩ nigin, kusĩ tamo disin, tamo taka ket ye weweur difen, takag age difen, idi Jesus geid, aa tetek bun didenen anidi. <sup>33</sup> Anĩ ere, idi Jesus wagen disi fen, ĩ mogo laa fen anĩ dilen, anĩ nigin, idi ĩ ye to weweur difen. <sup>34</sup> Anĩ fotokar, kusĩ tamo takam, ot nem Jesus siri gilĩ fe di, naud naan ado fi felen. <sup>35</sup> Tamo enei ilen im wogõ yen, yogon wogõya are momoi, ĩ keleĩ, ĩ momoi wogõ yef, are ãg momoi gouf nigin wogõ yef. <sup>36</sup> Negur nẽ Itotoya enei kisi falauf nigin agef wõ yen, “Yogon tuwa taka to were fouf,” ‡ <sup>37</sup> agef fen, Negur nẽ Itotoya takag irok, “Idi siri gilĩ difen tamo ĩ, idim dilouf.” §

### *Jesus Mũ Difen*

*(Matyu 27:57-61; Mak 15:42-47; Luk 23:50-56)*

<sup>38</sup> Anĩ dum, Josef Arimatea tamal, Jesus bouwa buru yalouf nigin Pailat irokenen. Josef ĩ, Jesus nẽ dõ fiya tamo taka, anĩ ere, ĩ Juda tamo nigin kumĩ ye fen, iminẽyan Jesus dõ fen. Pailat yo ye di, ĩ isi, Jesus bouwa yalen. <sup>39</sup> Josef ĩ Nikodemus ado fen, disin, kulu tamo anim, bõ Jesus gein ilen. Nikodemus ĩ, marasin yana mer (myrrh)

---

‡ 19:36: Eksodas 12:46; Namba 9:12; Sam 34:20 § 19:37: Sekaraia 12:10

aloi (aloe) ado falei difen anĩ iroulen, anĩ nẽ morõ teti kilogram age fiya. <sup>40</sup> Idi urom Jesus bouwa dale, marasin ado gabar lalau nem filu difen. Juda neid tamo mũ fiya tobonunã bunem age difen. <sup>41</sup> Jesus aa tetek bun dun nẽ modoũ an, kabĩ taka ado, kabier an, ku mata taka ado, taka an to goro difen. <sup>42</sup> Naa are Juda neid dodok fiya nẽ naa nigin ado, tokõ kug melsã nigin, idi Jesus an goro difen.

## 20

### *Matmat Gorõ Ibodon*

*(Matyu 28:1-8; Mak 16:1-8; Luk 24:1-12)*

<sup>1</sup> Uub nẽ naa matu Sande bun, bonimeia bagai gugum ado, Maria Magdala tamal matmat bun ile fen, mala irã, bobog bun meein yaleleya ilen. <sup>2</sup> Anĩ kayau, Simon Pita, dõ fiya taka Jesus ĩ nigin wau laa fedig anidi gedin gudu ref ile, irokenẽdin, “Idi Odug matmat bun tamal dale diroulen, ĩ nain be dinon, ada keleĩ sã!”

<sup>3</sup> Anĩ nigin, Pita, dõ fiya tamo taka ado, matmat bun dilen. <sup>4</sup> Urom gududu den, anĩ ere, dõ fiya tamo takam Pita wal fe, ĩ ket matmat bun wõ yen. <sup>5</sup> ĩ iti ken, fai yen, gabar lalau filu difen anĩ an yen mog, ilen, anĩ ere, ĩ kuren to ilen. <sup>6</sup> Age fe di, Simon Pita dum dõ fiyen, wõ ye fen, tokõ fel, matmat kuren ile, gabar lalau filu difen an yen mog, ilen, <sup>7</sup> mũ difen gabar Jesus mudur sile difen anĩg ilen. Mudur sile difen gabar are, yogo fire kori fel, gabar lalau filu difen anĩ firen ibodon. <sup>8</sup> Age fe di, dõ fiya tamo taka, ĩ ket matmat bun wõ yen ĩg, kuren ilen. ĩ ile fen, momoi yen. <sup>9</sup> (Jesus laa bun tamal kel fã youf ya, Negur nẽ Itotoya bun yenek anĩ, idi fau wedereid fokõya sã.)

### *Jesus Maria Magdala Tamal Bun Wõ Yen*

*(Matyu 28:9, 10; Mak 16:9-11)*

<sup>10</sup> Age de fen, dō fiya tar, nedi fō bun ke de dilen. <sup>11</sup> Anī ere, Maria matmat serē inā yalef ifaren. Ī inā ado inā ado iti ken, matmat namen fai yen. <sup>12</sup> Agef fen, ĩ, engel uru kolos lalau adodo, Jesus yenen modoũ bun dibod mog, iledin, taka muduren, taka yen.

<sup>13</sup> Idi ĩ to difiyen, “Kayau, õ ere nigin inā walef?”

Maria iron, “Idi neu Odug dale diroulen, ĩ nain be dinon anī, aya keleĩ sã.” <sup>14</sup> Age ye fen, ĩ falei yel, Jesus an ifar mog ilen, anī ere, are Jesusem ya anī to kelein.

<sup>15</sup> Jesus iron, “Kayau, õ ere nigin inā walef? Õ ai anī umirnek?”

Maria kisi fen, ĩ kabī lo fedig anim ye fen, irokenen, “Tamo biya, onom ĩ wale uroulen ouf are, nain be unon anī, aya urokana di, aya ĩ alouf.”

<sup>16</sup> Jesus ĩ irokenen, “Maria.”

Maria ĩ falei yel, Jesus wage ifen ken, Hibru od nem irokenen, “Raboni!” (anī nē gariya, Tise).

<sup>17</sup> Jesus iron, “Aya to urouna, ere nigin, aya Dei gein fau kel iseleya sã. Anī ere, neu turau tar gedin ule urokeneĩd, ‘Aya neu Dei, āgenei Temeĩ, neu Negur, āgenei Negur bun kelau eselauf.’ ”

<sup>18</sup> Anī nigin, Maria Magdala tamal, in dō fiya tar gedin ile irokenēdin, “Aya Odug ailel!” Age ye fen, Maria Jesus od enei irokenen anī, idi wogō fiyēdin.

### *Jesus In Dō Fiya Tar Meleid Bun Wō Yen*

*(Matyu 28:16-20; Mak 16:14-18; Luk 24:36-49)*

<sup>19</sup> Uub nē naa matu Sande aragau anī bun, Jesus nē dō fiya tar, Juda tamo nigin kumī de fen, sukar kotū difel, aaben guru de dibod mog, Jesus isi, idi atun ifar fen, iron, “Wau inosiya ã ado ibodōf!” <sup>20</sup> Od enī irokel fen, ĩ ima siri ado idi ifelnēdin. In dō fiya tar idi, Odug dile fen, fatuk bagai kulī den.

<sup>21</sup> Jesus baban iron, “Wau inosiya ã ado ibodõf! Dei aya sur fiyan gen, ayag ã sur ayeik.” <sup>22</sup> Age ye fen, idi bun fuu fiyeïd fen, iron, “Awa Uur Fateul waleg. <sup>23</sup> Æ, tamo neid mosor nigin, wedereï tu kalauf are, idi neid mosor nigin weder tu kelef, ã idi neid mosor nigin, wedereï to tu kalauf are, idi neid mosor nigin weder to tu kelef.”

*Jesus Tomas Mala Bun Wõ Yen*

<sup>24</sup> Anï ere, Jesus in dõ fiya tar meleid bun wõ yen sain, tuwelf idi neid taka Tomas (yana taka Didimus), idi geid to ibodon. <sup>25</sup> Anï nigin, dõ fiya tar tunim ï dirokenen, “Amã Odug mailen!”

Anï ere, ï idi irokenẽdin, “Aya yogon ima bun tuti ba to ailauf, aya imau gege tuti ba bun to ano fen, aya imau siri bun to anouf, aya to momoi auf.”

<sup>26</sup> Uub tekelei ilele di, in dõ fiya tar baban fõ bun dibodon, are Tomas geid. Sukar kotũ difedin, anï ere, Jesus isi, idi atun ifar fen, iron, “Wau inosiya ã ado ibodõf!”

<sup>27</sup> Agef fen, Jesus Tomas irokenen, “Ogon imã gege ein uno, neu imau uleid. Imã urã siru bun uno. Waũ to ilef isif fouf, momoi dogol wo.”

<sup>28</sup> Tomas Jesus irokenen, “Neu Odug, neu Negur!”

<sup>29</sup> Age ye di, Jesus Tomas irokenen, “Õ malam aya uleyaf nigin, momoi wof. Idi meledim to dile fen, momoi def, are el fedif.”

<sup>30</sup> Jesus, in dõ fiya tar meleid bun, memelik musei inodin, are buk enei bun itotoya san. <sup>31</sup> Anï ere, Jesus ï Kristus, Negur Naal anï ã momoi ge fen, ï yana nigin momoiya bunem, ã mata walogouf nigin enei itoton.

## 21

*Jesus Gau Yaleya Bun Memelik Inon*



<sup>1</sup> Anĩ dum, Jesus baban in dō fiya tar gedin, Taiberias daliyou<sup>\*</sup> wō yen. Anĩ eig fe wō yen. <sup>2</sup> Simon Pita, Tomas (yana taka Didimus), Nataniel Kana tamal Galili teneub bun, Sebedi gere tar ado, dō fiya tar uru anidim guru de dibodon. <sup>3</sup> Simon Pita idi irokenēdin, “Aya gau nigin ayō fenē.” Idi diron, “Amāg õ geid talauf.” Anĩ idi dile, waag bun sosō den, anĩ ere, bō anĩ bun, gau taka to dalen.

<sup>4</sup> Bonimeï bagai, Jesus maaĩ yerin ifaren, anĩ ere, dō fiya tar idi, Jesusem ya anĩ to kelein.

<sup>5</sup> Ī idi iweig irokenēdin, “Mou tar, ã gau taka tau walegel?”

Idi aiten dalen, “Sã.”

<sup>6</sup> Ī irokenēdin, “Waag siri biya melem kakāg urāg fen, tunĩ gei gouf.” Idi age difen sain, idi kakāg dī fiya kisi feleya san, ere nigin, gau musei biya.

<sup>7</sup> Anĩ in dō fiya tamo Jesus ĩ nigin wau laa fedig ĩ, Pita irokenen, “Are Odugem!” Ī, “Are Odugem,” ye di, Simon Pita karĩ ye fen, ĩ kolos teten tamal inũ inon anĩ yale, luwa guf fen, naanũ ifũ iran. <sup>8</sup> In dō fiya tar tunĩ ganen, waag bun disi, kakāg gau isokosen ado dī de dilen, ere nigin, are idi daliyou yeri gerō sã, hundred mita age fiya. <sup>9</sup> Sain idi kutũ desin, yã kaureya anĩ bun, gau yã bē bret tunĩ ado dilen.

<sup>10</sup> Jesus idi irokenēdin, “Ã gau gama bagai walegel tunĩ urousig.”

<sup>11</sup> Simon Pita waag sō ye fen, kakāg dī falaisi, maaĩ yerin irosin. Kakāg are gau odudug isokosen, gau are 153, gai musei biya, anĩ ere, kakāg to kokour fen. <sup>12</sup> Jesus idi irokenēdin, “Usig, saaf wōg.” In dō fiya tar kukĩ de fen, takam ĩ to, to fiyen, “Õ aim?” Idi keleĩ, are Odug yogo. <sup>13</sup> Jesus isi, bret yale fen, idi ifenēdin, gaug de age fen.

---

\* **21:1:** Yana taka are Galili Daliyou.

<sup>14</sup> Jesus laa bun tamal kel fã ye fen, in dõ fiya tar meleid bun wõ yen are, gama eneim towo fen.

*Jesus Pita Baban Wau Yalen*

<sup>15</sup> Sain idi saaf dakas fen, Jesus Simon Pita irokenen, “Simon Jon naal, õ aya nigin fatuk waũ laa fef, tunĩ eneidi neid wal fiya de?”

Pita iron, “Odug, momoi, õ keleĩ, aya õ nigin wau laa fef.”

Jesus iron, “Neu sipsip momou ufoutneĩd.”

<sup>16</sup> Baban Jesus iron, “Simon Jon naal, õ aya nigin waũ laa fef de?”

Pita solof iron, “Odug, momoi, õ keleĩ, aya õ nigin wau laa fef.”

Jesus iron, “Neu sipsip kulatun wiyẽdiyof.”

<sup>17</sup> Jesus Pita iroken towo fe fen, iron, “Simon Jon naal, õ aya nigin waũ laa fef de?”

Pita wau moron, ere nigin, Jesus ã to fiyẽ towo fen, “Õ aya nigin waũ laa fef de?” Pita iron, “Odug, erob erob ganan õ keleĩ, õ keleĩ, aya õ nigin wau laa fef.”

Jesus iron, “Neu sipsip ufoutneĩd. <sup>18</sup> Aya õ momoi bagai arokonok, sain õ gaun, õ naki rel, ogon oroya dõ fen uledig, anĩ ere, sain õ tubau bun, imã walese di, taka nem ifõyo ken, õ to oroyok nẽ an irouleyõf.” <sup>19</sup> Pita naig be fe, laaf fen, Negur fula fiya medeĩya ifenẽf anĩ nigin, Jesus od enei iron. Age ye fen, Jesus Pita irokenen, “Aya dõ wiya!”

<sup>20</sup> Pita falei yel fen, dõ fiya taka Jesus ã nigin wau laa fedig anĩ, dõ feid mog, ilen. (Tamo enei bõ saaf yõya bun, Jesus akoron mudur isen ken, iron, “Odug, aim anĩ õ kiwai ifonõf?”) <sup>21</sup> Sain Pita tamo anĩ ile fen, Jesus to fiyen, “Odug, tamo enei ã naig fof?”

<sup>22</sup> Jesus solof irokenen, “Tamo enei mata ibod mog, aya kelauf anĩ aya orouf aufeg, õ nigin ere yok? Õ de aya dõ wiyauf.” <sup>23</sup> Enei nigin, dõ fiya tar idi atun, od enei

iyokelen, are dõ fiya tamo enei to laa foug den. Anĩ ere, Jesus, tamo anĩ to laa foug ya nigin to iron, Jesus ĩ eig ye iron, “Tamo enei mata ibod mog, aya kelauf anĩ aya orouf aufeg, õ nigin ere yok?”

<sup>24</sup> In dõ fiya tamo enei, anĩ ganan wogõ ye fen, itoton. Amã keleĩ, in od are momoi.

<sup>25</sup> Jesus ĩ ereb ereb museig age fen. Aya kisi afef, anĩ ganan buk bun ditotlem are, teneub ganan bun modoũ sam.

**Mata Ifenēya Nē Od**  
**The New Testament in the Marik Language of Papua New Guinea**  
**Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea